

# ՏԵՂԵԿԱՏՈՒԻ

ԴԵԳԻԵԳԱԾՈՒՄ

ديجيتال

Հրատարակութիւն Գահիրէի ՀԲԸՄ-ի

نشرة جمعية القاهرة الخيرية الأرمنية العامة



## ՀԲԸՄ-ի ԵԳԻՊՏՈՍԻ ՇՐՋԱՆԱԿԱՅԻՆ ՅԱՆՁՆԱԾՈՂՈՎԻ ԿԱԶՄԸ

Ձախէն աջ, ա. շարք՝ Տոքթ. Վիգէն Ծիզմէճեան, Տիար Պերճ Թերզեան, Տիար Օսնիկ Պըլըքտան-եան, Տիար Ժիրայր Տեփոյեան

Ձախէն աջ, բ. շարք՝ Տիար Լեւոն Նիկոլեան, Տոքթ. Գեորգ Երզնկացեան, Տիկին Կասիա Ծղալեան, Տիար Ռուբէն Թերզիպաշեան

## ԲՈՎԱՆԴԱԿՈՒԹԻՒՆ

**ԽՄԲԱԳԻՐ**  
Շաքլ Մարգարեան

**ԽՄԲԱԳՐՈՒԹԵԱՆ  
ԽՈՐՀՐԴԱՏՈՒ**  
Պերճ Թերզեան

**ՍՐԲԱԳՐԻՉ  
ՎԵՐՍՏՈՒԳԻՉ**  
Անայիս Ճիզմեճեան

**ԳԵՂԱՐՈՒԹԵՍԱԿԱՆ  
ՁԵՒԱԽՐՈՒՄ**  
Շահէ Լուսարարեան

**ՀԱՄԱԿԱՐԳՉԱՅԻՆ  
ՇԱՐՈՒՎՃԸ**  
Վարդուհի Արթինեան

**ՏՊԱԳՐՈՒԹԻՒՆ**  
Nubar Printing Press

**Թիւ 73 Նոր Շրջան  
ՀՈՎՏԵՄԲԵՐ 2014**

**Գահիրեի ՀԲԸՄ-ի  
լուրերուն հետեւեցէք  
www.agbuegypt.com  
կայքէջով**

**Հաղորդագրութիւն 1**

**Հայաստան-Սփիւռք Համահայկական 5-րդ Համաժողով 2**

**ՀԲԸՄ-ի Նախագահ Պերճ Սեդրակեանի Ուղերձը  
(Ներկայացուած Պրն. Վազգէն Եագուլեանի կողմէ) 5**

**ՀԲԸՄ-ի Կ.Վ. Ժողովի Անդամ Վազգէն Եագուլեանի Ելոյթը՝  
«Սիրիահայ Համայնքի Հիմնախնդիրները» թեմայով  
Նիստին 7**

**ՀԲԸՄ-ի Ներկայացուցիչներու Մասնակցութիւնը  
Հայաստան-Սփիւռք Համահայկական 5-րդ Համաժողովին 9**

**Գահիրեի ՀԲԸՄ-ի Համացանցով Կազմակերպած Ճատրակի  
Դասընթացները Սկսան 15 Մասնակիցներով 10**  
*ՀԲԸՄ-ի կայքէջէն քաղեց՝ Անայիս Ճիզմեճեան*

**Սուրիահայութիւնը Կը Շարունակէ Իր Առօրեան 11**  
*Քաղուած ՀԲԸՄ-ի Հալէպի Պաշտոնաթերթ «Հայեացք»էն*

**Տարիներու Հանրագումար 13**  
*Անժիկ Յակոբեան-Կանիմեան*

**«Արցախ» Երգչախումբը Հայրենիքի Մէջ 16**  
*Լուսածին Ղազէլեան*

**Մահ Եւ Յուղարկաւորութիւն Գեորգ Փիլիկեանի 19**  
*Նազարէթ Գարթալեան*

**ՀՄԸՄ ԿԱՄՔԻ 2014-ի Տարեկան Մրցաշարը 20**  
*Սօսի Ներեւտեան-Յակոբեան*

**Հելիոպոլսոյ ՀՄԸՄ ՆՈՒՊԱՐԻ 2014-ի Մրցաշարը 22**  
*Սօսի Ներեւտեան-Յակոբեան*



## ՀԱՂՈՐԴԱԳՐՈՒԹԻՒՆ

Այսու կը տեղեկացնենք թե ՀԲԸՄ-ի Եգիպտոսի Շրջանակային Յանձնաժողովէն երկու անդամներ՝ Տեարք Պերճ Թերզեան (Ատենապետ) եւ Օննիկ Կարիպեան (Ա. Փոխ Ատենապետ), ՀԲԸՄ-ի Ընդհանուր Կանոնագրով նախատեսուած վարչական պաշտօններ վարելու տարիքին սահմանը հասած կամ հասնելու մօտեցած ըլլալով, Միութեան Կեդրոնական Վարչական Ժողովը նպատակայարմար դատած է, որ նշանակէ Յանձնաժողովի նոր կազմ մը:

Այս առիթով Կեդրոնական Վարչական Ժողովը մեծապէս գնահատելով ՀԲԸՄ-ի Եգիպտոսի Շրջանակային Յանձնաժողովէն ներս Տիար Պերճ Թերզեանի ունեցած յիսնամեայ գործունեութիւնը եւ բեղմնաւոր իրագործումները, որոշած է զինք նշանակել Յանձնաժողովի Պատուոյ Ատենապետ եւ հրաւիրել՝ որ բացառութեան կարգով շարունակէ մասնակցիլ Յանձնաժողովի նիստերուն, մինչեւ որ ընթացիկ կարգ մը առկախ հարցեր իրենց բարեյաջող լուծումը գտնեն:

Յանձնաժողովը պիտի ունենայ հետեւեալ կազմը.

Տիար Պերճ Թերզեան	Պատուոյ Ատենապետ
Տիար Օննիկ Պըլըքտանեան	Ատենապետ
Տոքթ. Վիգէն Ծիգմեճեան	Փոխ Ատենապետ
Տիկին Կասիա Ճղալեան	Ատենադպրուի
Տիար Ռուբէն Թերզիպաշեան	Գանձապահ
Տիար Լեւոն Նիկոլեան	Փոխ Գանձապահ
Տոքթ. Գեորգ Երզնկացեան	Խորհրդական
Տիար Ժիրայր Տեփոյեան	Խորհրդական

Այս առթիւ, առ ի գնահատանք ՀԲԸՄ-ի Եգիպտոսի գերադաս գործադիր ժողովին մէջ Տիար Օննիկ Կարիպեանի երկարամեայ նուիրեալ ծառայութեան եւ ատենին Միութեան կալուածական եւ օրինական հարցերու բարւոյք լուծման ուղղութեամբ որպէս փոխ ատենապետ իր կատարած գնահատելի ներդրումին, Կեդրոնական Վարչական Ժողովը որոշած է իրեն շնորհել ՀԲԸՄ-ի Պատուոյ Անդամի բարձր եւ արժանաւոր տիտղոսը՝ համապատասխան վկայագրի յանձնումը յարմար ամենականուի առիթով կատարելու ծրագրով:

7 Զոկտեմբեր 2014

ՏԵՂԵԿԱՏՈՒ ԴԻՄՆ  
ՀԲԸՄ-Ի ԵԳԻՊՏՈՍԻ ՇՐՋԱՆԱԿԱՅԻՆ ՅԱՆՁՆԱԺՈՂՈՎԻ



## ՀԱՅԱՍՏԱՆ-ՍՓԻՒՌ ՀԱՄԱՀԱՅԿԱԿԱՆ 5-ՐԴ ՀԱՄԱԺՈՂՈՎ



Սեպտեմբեր 19-ին, Ալ. Սպենդիարեանի Անուան Օփերայի Եւ Պալետի Ազգային Ակադեմական Թատրոնին մէջ տեղի ունեցաւ ՀՀ Սփիւռքի Նախարարութեան նախաձեռնութեամբ կազմակերպուած Հայաստան-Սփիւռք Համահայկական 5-րդ Համաժողովին բացման հանդիսաւոր արարողութիւնը:

Համաժողովի լիազումար նիստին բացման եւ ողջոյնի խօսքերով հանդես եկան ՀՀ Վարչապետ Յովիկ Աբրահամեան ու Լեռնային Ղարաբաղի Հանրապետութեան Նախագահ Բակօ Սահակեան: Համաժողովի մասնակիցներուն իրենց օրհնութեան խօսքը յղեցին Ամենայն Հայոց Կաթողիկոս Ն.Ս.Օ.Տ.Տ. Գարեգին Բ, Մեծի Տանն Կիլիկիոյ Կաթողիկոս Ն.Ս.Օ.Տ.Տ. Արամ Ա, Հայ Կաթողիկէ Եկեղեցւոյ Պատրիարք-Կաթողիկոս Ներսէս Պետրոս ԺԹ: Ելոյթ ունեցան նաեւ Հայ Աւետարանա-

կան Համաշխարհային Խորհրդի Նախագահ Վերապատուելի Յովել Միքայէլեան, ՀԲԸՄ-ի Կեդրոնական Վարչական Ժողովի անդամ Վազգէն Եագուպեան (որ ընթերցեց ՀԲԸՄ-ի Նախագահ Պերճ Սեդրակեանի ուղերձը), ՀՀԴ Բիւրոյի ներկայացուցիչ Հրանտ Մարգարեան, ՍԴՀԿ Կեդրոնական Վարչութեան Ատենապետ Յակոբ Տիգրանեան, ՌԱԿ Կեդրոնական Վարչութեան Ատենապետ Մայք Խարապեան, Արմինա Դարբինեան (որ ներկայացուց Ամերիկահայ Համագումարի Հոգաբարձուներու Խորհրդի Նախագահ Հրայր Յովնանեանի ուղերձը), Ռուսաստանի Հայերու Միութեան Նախագահ Արա Աբրահամեան, ՀՕՄ Կեդրոնական Վարչութեան Ատենապետուհի Վիքի Մարաշլեան, Համազգային Հայ Կրթական Եւ Մշակութային Միութեան Կեդրոնական Վարչութեան Ատենապետ Սկրտիչ Սկրտիչեան:



Նոյն օրը սկսաւ 2-րդ լիազումար նիստը, ուր համաժողովի չորս հիմնական թեմատիկ ուղղութիւններու վերաբերեալ գեկուցումներով հանդէս եկան ՀՀ Սփիւռքի Նախարար Յրանուշ Յակոբեան (Հայաստան-Սփիւռք գործակցութեան արդի առաջնահերթութիւնները եւ ապագային միտումը ինդիքները), ՀՀ ԳԱԱ Հայոց Տեղասպանութեան թանգարան-ինստիտուտի տնօրէն, Հայոց Տեղասպանութեան 100-րդ Տարելիցին Նուիրում Միջոցառումները Համակարգող Պետական Յանձնաժողովի քարտուղար Հայկ Դեմոյեան (Հայոց Տեղասպանութեան 100-րդ տարելիցին նուիրում միջոցառումներու կազմակերպման մասին), Սուրիահայերու Հետ Տարուող Աշխատանքները Համակարգող Աշխատանքային Խումբի ղեկավար, ՀՀ Սփիւռքի Նախարարութեան աշխատակազմի ղեկավար Ֆիրդուս Չաքարեան (Հայաստանի Հանրապետութեան մէջ ապաստանած սուրիահայերու հիմնախնդիրներու մասին) եւ Լրագրողներու Համահայկական Համաժողովները Համակարգող Մարմնի նախագահ, «Ազդակ» օրաթերթի գլխաւոր խմբագիր Շահան Գանտահարեան (Հայկական մամուլի դերը համաշխարհայնացուող աշխարհին մէջ):

Համաժողովի աշխատանքները՝ չորս թեմատիկ բաժիններով, զուգահեռաբար շարունակուեցան Էլիթ Փլազա Պիզնէս կէդրոնին մէջ, որմէ վերջ Համաժողովի մասնակիցներուն ընդունեց ՀՀ Ազգային ժողովի նախագահ Գալուստ Սահակեան:

Համաժողովին մասնակցելու նպատակով Հայրենիք ժամանած էին աշխարհի 60 երկիրներու հայկական կազմակերպութիւններու եւ կառոյցներու ղեկավարներ ու ներկայացուցիչներ՝ 741 մասնակից:

Առաջին օրը, համաժողովի պատուիրակութիւնը՝ ՀՀ Սփիւռքի Նախարար Յրանուշ Յակոբեանի գլխաւորութեամբ այցելեց Ծիծեռնակաբերդի յուշահամալիր, յարգանքի տուրք մատուցելու Հայոց Տեղասպանութեան անմեղ զոհերու յիշատակին: Այնուհետեւ Ծիծեռնակաբերդի

յուշահամալիրի Յիշողութիւններու պուրակին մէջ տեղի ունեցաւ խորհրդանշական ծառատունկ՝ ի յիշատակ Հայոց Տեղասպանութեան 100-րդ տարելիցի եւ Հայաստան-Սփիւռք 5-րդ Համաժողովի:

Երկրորդ լիազումար նիստի ընթացքին գեկուցումներ ներկայացուեցան չորս հիմնական թեմատիկ ուղղութիւններու վերաբերեալ: Համաժողովի թեմատիկ նիստերու ամփոփումէն յետոյ, բոլոր նիստերու մասնակիցներուն համար ելոյթ ունեցաւ ՀՀ Արտաքին Գործերու Նախարար Էդուարդ Նալբանդեան: Նախարարը ներկայացուց Հայաստանի Հանրապետութեան արտաքին գերատեսչութեան ձեռքբերումներն ու առկայ մարտահրաւերները:

Էդուարդ Նալբանդեան բարձր գնահատեց հայկական Սփիւռքի դերը Հայաստանի միջազգային վարկի բարձրացման գործին մէջ:

20 Սեպտեմբերին, Ալ. Սպենդիարեանի Անուան Օփերայի եւ Պալէտի Ազգային Ակադեմական Թատրոնի դահլիճին մէջ տեղի ունեցաւ Հայաստան-Սփիւռք Համահայկական 5-րդ Համաժողովի ամփոփիչ լիազումար նիստը, որուն ժամանակ գեկոյցով հանդէս եկաւ ՀՀ Նախագահ Սերժ Սարգսեան: Անդրադառնալով Հայոց Տեղասպանութեան 100-րդ տարելիցին, Հանրապետութեան Նախագահը նշեց. «2015 թ. մենք ազգովի ոգեկոչելու ենք Հայոց Տեղասպանութեան 100-րդ տարելիցը: Այն վերստին հաստատելու է հայրենազրկուած հայ ժողովրդի՝ ապրելու եւ արարելու, յարատելելու կամքն ու վճռականութիւնը, փաստելու է մեր միասնականութեան, ազգային իղձերի իրականացման մեր հետեւողականութիւնը: 2015 թուականը քաղաքական լուրջ նախաձեռնութիւններու եւ ձեռքբերումներու տարի պետք է դառնայ Հայաստան-Սփիւռք-Արցախ եռամիասնութեան համար»:

Սուրիայէն ներգաղթած մեր հայրենակիցներու մասին խօսելով, Հանրապետութեան Նախագահը նշեց, որ անոնք եղեռնը վերապրած մեր նախնիներու բեկորներն են, որոնք սփռուելով աշխարհով մէկ, կրցան պահպանել ազգային դիմա-



գիծն ու հայկականութիւնը:

Իր խօսքը աւարտելով, ՀՀ Նախագահ Սերժ Սարգսեան շնորհաւորեց ներկաները Հայաստանի Հանրապետութեան անկախութեան 23-րդ տարեդարձին կապակցութեամբ եւ կոչ ըրաւ բոլոր հայերուն անդադար ամրացնել կապը հայրենիքին հետ:

Ապա ՀՀ Նախագահի աշխատակազմի ղեկավար Վիգէն Սարգսեան, խօսեցաւ Հայոց Ցեղասպանութեան 100-րդ տարելիցին նուիրուած միջոցառումներուն մասին: Ան նշեց որ ՀՀ Նախագահի գլխաւորած Հայոց Ցեղասպանութեան 100-րդ պետական, համահայկական յանձնաժողովի եւ յիսուէ աւելի տարածաշրջանային յանձնախումբերու ստեղծումը նոր որակ հաղորդեց Օսմանեան Թուրքիոյ եւ Արեւմտեան Հայաստանի մէջ պետականօրէն մշակուած եւ իրագործուած Հայոց Ցեղասպանութեան ճանաչման, դատապարտման եւ հետեւանքները վերացնելու ուղղուած գործընթացներուն:

«Երբ մեր թշնամին կը սպաննէր եւ 20-րդ դարասկզբում կը կոտորէր մեզ, անոր մեծագոյն ցանկութիւնն էր տեսնել հայերը յուսալքուած եւ բաժան-բաժան», - նշեց ՀՀ Նախագահի աշխատակազմի ղեկավարը՝ յաւելելով, որ ի հեճուկս այդ ցանկութեան, այսօր առկայ է Հայաստան-Արցախ-Սփիւռք հզօր եռամիասնութիւնը:

Հայրենիք-Սփիւռք 5-րդ Համահայկական համաժողովի մասին ամփոփիչ ելոյթով հանդէս եկաւ ՀՀ Սփիւռքի Նախարար Հրանուշ Յակոբեան: Նախարարը համաժողովի ընթացքին հնչած հարցադրումները բաժանեց երկու մասի՝ զարգացնել գործակցութեան եղած կառուցակարգերը եւ ստեղծել նոր կառուցակարգեր:

Իր խօսքի աւարտին ՀՀ Սփիւռքի նախարարն ընդգծեց. «Մենք ուժեղ ենք միասին եւ միասնաբար ենք կերտելու մեր պատմութիւնն ու ապագան՝ յանուն անկախ ու յաղթանակած Արցախի եւ կազմակերպուած Սփիւռքի»:

Համաժողովի աւարտին Լիբանանի ՀԲԸՄ-ՀԵԸ-ի պաշտօնաթերթ «Խօսնակ» ամսագրի գլխաւոր խմբագիր Համբիկ

Մարտիրոսեան ընթերցեց Հայաստան-Սփիւռք 5-րդ Համաժողովի ընդունած յայտարարութիւնը:

Սեպտեմբեր 20-ին Հայաստան-Սփիւռք Համաժողովի մասնակիցները այցելեցին ՀՀ Պաշտպանութեան Նախարարութիւն եւ հանդիպում ունեցան Պաշտպանութեան Նախարար Սեյրան Օհանեանի հետ:

Սեյրան Օհանեան իր խօսքին մէջ անդրադարձաւ Մերձաւոր Արեւելքի եւ Ուքրաինոյ մէջ տեղի ունեցող իրադարձութիւններուն, որոնք իրենց ազդեցութիւնը կը ձգեն մեր համայնքներուն եւ Հայաստանի վրայ:

Նախարարը համաժողովի մասնակիցներուն ամփոփ կերպով ներկայացուց բանակաշինութեան փուլերն ու առանձնաշատկութիւնները, Հայկական բանակի ձեռքբերումները:

Հանդիպումի աւարտին Սեյրան Օհանեան պատասխանեց համաժողովի մասնակիցներու հարցերուն:

ՀՀ Պաշտպանութեան Նախարարութեան վերջ, Հայաստան-Սփիւռք 5-րդ Համաժողովի մասնակիցներն ուղեւորուեցան դէպի Գ. Սունդուկեանի Անուան Պետական Ակադեմական Թատրոն՝ դիտելու «Ոտքի՛, Դատարանն է Գալիս» թատերախաղը:

21 Սեպտեմբերին՝ Հայաստանի Հանրապետութեան անկախութեան 23-րդ տարեդարձին օրը, համաժողովի մասնակիցները այցելեցին Էջմիածին: Անոնք նախ՝ պտըտեցան Մայր Տաճարի տարածքին մէջ եւ ծանօթացան յարակից շինութիւններու նշանակութեան, ապա՝ ներկայ գտնուեցան Ս. Պատարագի արարողութեան: Որմէ ետք, համաժողովի մասնակիցները այցելեցին Եռաբլուրի գինուորական պանթէոն:

Նոյն օրը երեկոյեան, Հայաստան-Սփիւռք 5-րդ Համաժողովի մասնակիցները ներկայ գտնուեցան Կարէն Դեմիրճեանի Անուան Մարզահամերգային Համալիրին մէջ ՀՀ Նախագահի՝ Անկախութեան Օրուան նուիրուած ընդունելութեան:



**ՀԱՅԿԱԿԱՆ ԲԱՐԵԳ-ՈՐԾԱԿԱՆ  
ԸՆԴ-ՀԱՆՈՒՐ ՄԻՈՒԹԵԱՆ ՆԱԽԱԳԱՀ  
ՊԵՐՃ ՍԵՂՐԱԿԵԱՆԻ ՈՒՂԵՐՁԸ  
(ներկայացուած Պրն. Վազգէն Եագուպեանի կողմէ)**

Մեծարգոյ Վարչապետ Յովիկ Աբրահամեան  
Լեռնային Ղարաբաղի Հանրապետութեան Մեծարգոյ Նախագահ Բակո Սահակեան  
Նորին Ս. Օծութին Գարեգին Բ. Կաթողիկոս Ամենայն Հայոց  
Մեծի Տանն Կիլիկիոյ Կաթողիկոս Նորին Ս. Օծութին Արամ Ա.  
Հայ Կաթողիկէ Եկեղեցւոյ Պատրիարք-Կաթողիկոս Ներսէս Պետրոս 19-րդ  
Հայ Աւետարանական Եկեղեցիներու Համաշխարհային Խորհուրդի Նախագահ՝  
Վերապատուելի Յովել Միքայէլեան  
Յարգելի պետական ներկայացուցիչներ եւ գործակիցներ

Անձնապէս, նաեւ Հայկական Բարեգործական Ընդհանուր Միութեան հայրենի ու աշխարհատարած կառոյցներուն եւ Կեդրոնական Վարչական Ժողովին անունով, կ'ողջունեմ Հայաստան-Սփիւռք Հինգերորդ այս Համաժողովը:

ՀԲԸՄիութեան գոյառումը եւ Հայ ժողովուրդին ու Մայր Հայրենիքի բարօրութեան եւ հայ ինքնութեան պահպանումին ուղղուած անոր 108-ամեայ գործունեութիւնը, բխած են «մէկ հայ ժողովուրդ» հասկացութենէն եւ ամբողջ հայութեան համադրեալ ճիգերով գործելու անհրաժեշտութեան գիտակցութենէն: Հետեւաբար, մեզի համար ողջունելի են Սփիւռքի Նախարարութեան նախաձեռնութեամբ կազմակերպուած Հայաստան-Սփիւռք համաժողովները, որոնցմէ իւրաքանչիւրը հասունացումի, առաւել փոխ-հասկացողութեան ու փոխ-ըմբռնման եւ ուժերու ու կարողականութեան համադրումի նոր հանգրուան մը կը հանդիսանայ մեր ժողովուրդի տարասփիւռ զանգուածներուն եւ կառոյցներուն համար:

Համաժողովի կողմնորոշումը՝ հիմնուած Հայաստան-Արցախ-Սփիւռք գործակցութեան ընդլայնումին եւ զարգացման սկզբունքներուն վրայ, իր առաջնահերթութիւններով՝ կ'ընդգրկէ մեր ներկայի ազգային գլխաւոր մարտահրաւերները:

Մենք բարձր կը գնահատենք Սփիւռքի Նախարարութեան գործունեութիւնը, յանձին Նախարարուհի Հրանուշ Յակոբեանին, իր յանձնառու կեցուածքին ու Հայաստան-Սփիւռք յարաբերութիւններու զարգացման գործընթացին մէջ ցուցաբերած հասկացողութեան եւ կատարած նախաձեռնութիւններուն համար:

Մեր աշխարհասփիւռ ցրուածութեան պատճառով բարդ եւ դժուար յաղթահարելի են մեր ազգի դիմագրաւած մարտահրաւերները ու յաճախ խոցելի են մեր համայնքներէն շատերը: Բայց նոյն այդ իրականութեան մէջ է նաեւ մեր զօրութիւնը եւ ձեռք բերած տոկոսութիւնը՝ որ կը խտանայ Հայաստան-Արցախ-Սփիւռք գործակցութեան ու զօրակցութեան կարգախօսին մէջ:

Հայաստան-Սփիւռք Հինգերորդ այս Համաժողովը կը կայանայ տարածաշրջանային քաղաքական ու ռազմական մտահոգիչ իրադարձութիւններու ծանր մթնոլորտին մէջ: Վայրագ ու այլաւերժ խմբաւորումներու կողմէ ի գործ դրուող կործանիչ գործողութիւններն ու անոնց ստեղծած մարդկային ողբերգութիւնը, մեզ կը մղէ մեր կարելիութիւնները առաւելաբար տրամադրելու տագնապի մատնուած հայ համայնքներու կարիքներուն: Այս կացութիւնը իր տարողութեամբ նաեւ կը շեշտէ հայրենի պետութեան դերին կարեւորութիւնը եւ Հայրենիք-Սփիւռք, պետութիւն եւ եկեղեցի գործակցութեան անհրաժեշտութիւնը:

Այս կապակցութեամբ անցնող երկու տարիներուն մեր համընդհանուր ճիգերը կեդրոնացան սուրիահայութեան տագնապի դիմագրաւումին վրայ: Նոր զարգացումները անհրաժեշտ կը դարձնեն որ մենք ուշադիր ըլլանք նաեւ իրաքահայութեան ճգնաժամին եւ կարիքներուն:

Միաժամանակ, անհրաժեշտ է որ մեր ուշադրութիւնը եւ ճիգերը կեդրոնացած պահենք մեր ազգային առաջնահերթութիւններուն վրայ, որոնք նիւթ պիտի դառնան համաժողովի նիստերուն: Հայասփիւռքի զարգացող իրականութիւնը՝ աշխարհագրական, ընկերային, կենցաղային ու ինքնութեան բաղկացուցիչներով ու տակաւ ընդարձակուող նոր համայնքներով, յատկա-



պես երիտասարդ գործարար փայլուն նոր սերունդով, մեր Միութեան կողմնորոշումներու հիմքը կը կազմեն: Մեր Արեւելեան եւ Արեւմտեան սփիւռքները, որոնք գրեթէ մէկ դար անջատ էին իրարմէ, այսօր որպէս մէկ ազգ եւ մէկ ժողովուրդ կը համադրեն իրենց ճիգերը ինքնավստահութեամբ դրսեւորելու համար մեր ազգի ներուժը ու նոր եւ հզօր կարելիութիւններով դիմագրաւելու մեր նոր իրականութիւնը:

Մենք լիովին կողմնակից ենք մեր գործելակերպը, կառոյցները եւ կազմակերպութիւնները վերատեսութեան ենթարկելու անհրաժեշտութեան՝ արդիւնաւորութեամբ դիմագրաւելու համար ազգային մարտահրաւերները: Ժամանակն է որ մեր ազգը՝ որպէս պետութիւն եւ ժողովուրդ՝ Հայաստան եւ Սփիւռք, ձերբազատուի իր գոյութիւնը եւ ինքնութիւնը պահպանելու տարրական մտահոգութենէն եւ անկէ բխող գործելակերպէն, որոնք իր մէջ արմատացած են պատմական դառն փորձառութիւններու պատճառով: Անհրաժեշտ է որ մեր մտասուեռումը ըլլայ Հայ ազգի առաւել բարգաւաճումը եւ հզօրացումը՝ ապագայի կերտումին հեռանկարով եւ համապատասխան գործունեութեամբ:

Հայասփիւռքը գործօն դեր պետք է ստանձնէ Սփիւռքի մէջ ժողովուրդներու եւ քաղաքակրթութիւններու երկխօսութեան եւ բարեկամական կապերու ամրապնդման, Հայաստանի վարկի զօրացման եւ Հայաստան-Սփիւռք եւ Սփիւռք-Սփիւռք կապերու աշխուժացումին ի նպաստ, մտասուեռում ունենալով Հայաստանի հզօրացումը՝ ամուր պետականութեամբ, ընկերային զօրաւոր կառոյցներով եւ ժողովրդավար գործընթացով:

Մենք խորապէս կը գիտակցինք դարերու ընթացքին մեր ազգի գոյատեւումին եւ մեր դաստիարակութեան, ինքնութեան ու մշակոյթի պահպանման ու զարգացումին ուղղութեամբ Հայ Եկեղեցւոյ կատարած պատմական դերին:

Մայր Աթոռ Ս. Էջմիածնի հանդէպ անխախտ հաւատարմութիւնը մեր Միութեան կողմնորոշումի հիմքերէն մին հանդիսացած է միշտ: Մենք կը շարունակենք մեր զօրակցութիւնը եւ օժանդակութիւնը Հայ Եկեղեցիին եւ համայնքային կեանքի զարգացման ի նպաստ անոր կատարած աշխատանքներուն: Յատկապէս երիտասարդ սերունդի կարիքներուն եւ արդի պահանջներուն հաղորդակից հոգեւորականներու պատրաստութեան աշխատանքը առաջնակարգ կարեւորութիւն ունի մեզի համար:

Մեծի Տանն Կիլիկիոյ Կաթողիկոսութիւնը, շարունակելով իր պատմական դերը, Միջին Արեւելքի ներկայ քաղաքական փորձանաւոր իրականութեան մէջ, իմաստուն եւ շրջահայեաց առաջնորդութիւն կը ցուցաբերէ շրջանի մեր համայնքներուն, որոնք դժբախտաբար իբր արդիւնք տարածաշրջանային վերիվայրումներուն, պարբերական արտագաղթով կը հեռանան դէպի այլ երկիրներ:

Հայ Եկեղեցւոյ մեր հասկացողութիւնը նաեւ՝ կ'ընդգրկէ մեր նուիրապետական աթոռները, որոնք իրենց զոհաբերումով, նուիրեալ գործունեութեամբ եւ արժեքաւոր ներդրումներով սատարած են մեր ազգի հոգեւոր արթնութեան եւ մշակութային գանձերու յայտնաբերումին ու պահպանումին:

Հայ Կաթողիկէ եւ Աւետարանական եկեղեցիները նոյնպէս, հակառակ իրենց փոքր թիւին, կարեւոր ծառայութիւններ կը մատուցեն մեր համայնքներու հոգեւոր, մշակութային եւ կրթական կեանքին: Եկեղեցիներու Համաշխարհային Խորհուրդէն ներս իրենց ներկայութեամբ նաեւ, անոնք կարեւոր դեր կը կատարեն այսօր:

Մենք, իբր համահայկական կազմակերպութիւն, շեշտակիօրէն կը շարունակենք մեր հայրենակեդրոն ուղղութիւնը, ընդարձակելով Հայաստանի մէջ մեր ներկայութիւնը եւ ծրագիրները, նաեւ բազմապատկելով աշխարհատարած մեր կառոյցներու գործունեութիւնը եւ համագործակցական նախաձեռնութիւնները ի նպաստ հայ մշակութային ժառանգութեան պահպանումին ու ծանօթացումին: Մենք կ'աշխատինք նաեւ միջազգային գիտահետազօտական մարդկային իրաւանց շրջանակներու մէջ մեր ժողովուրդի ազգային իրաւունքներու հետապնդման ուղղութեամբ:

Այս առթիւ կը հաստատենք նաեւ մեր մնայուն տրամադրութիւնը գործակցելու բոլոր այն կազմակերպութիւններուն եւ կառոյցներուն հետ, որոնք իրենց ճիգերը կ'ուզեն համադրել մէկ ժողովուրդ եւ հայրենի փայլուն ապագայ կերտելու ձգտումով:

Բարի երթ ու յաջողութիւն կը մաղթենք համաժողովի աշխատանքներուն:



**ՀԲԸՄ-ի ԿԵԴՐՈՆԱԿԱՆ ՎԱՐՉԱԿԱՆ ԺՈՂՈՎԻ ԱՆԴԱՄ՝  
ՎԱՋԳԷՆ ԵԱԳՈՒԳԵԱՆԻ ԵԼՈՅԹԸ  
«Սիրիահայ Յամայնքի Հիմնախնդիրները» թեմայով նիստին**



**Հայաստան-Սփիւռք 5-րդ Համաժողովի յարգելի մասնակիցներ.**

Սուրիոյ մէջ պատերազմը կը շարունակուի: Հալէպի, Դամասկոսի, Գամիշլիի, Զեսապի եւ այլ քաղաքներու հայութիւնը կը կրէ մարդկային զոհեր ու նիւթական ծանր վնասներ: Խոյս տալով պատերազմէն՝ հազարաւոր սուրիահայեր ապաստան կը գտնեն բազմաթիւ երկիրներու, ի շարս որոնց Լիբանանի եւ Հայաստանի մէջ: ՀԲԸՄ-ի Կեդրոնական Վարչական Ժողովը ատենին 1 մլն. ամերիկեան տոլարի շտապ օժանդակութեան պահեստի գումար մը նշանակած էր սուրիահայութեան օգնելու նպատակով: Միութիւնը գումարներ հանգանակելու կոչով դիմած էր նաեւ սփիւռքահայութեան: Այդ կոչին ընդառաջած են շատեր՝ նկատելիօրէն աւելցնելով այդ գումարը եւ հասցնելով շուրջ 2 միլիոն ամերիկեան տոլարի:

ՀԲԸՄ-ի աջակցութիւնը կ'ընթանայ 3 ուղղութեամբ՝ Սուրիա, Հայաստան, Լիբանան:

**Սուրիա**

Միութեան մարդասիրական օգնութեան ծրագիրներուն հիմնական մասը անմիջականօրէն կը կազմակերպուի եւ կը համադրուի Հալէպի, Դամասկոսի, Ճեզիրէի եւ Ծովափի ՀԲԸՄ-ի Արտակարգ Վիճակի մարմիններուն կողմէ, որոնք սերտօրէն կը համագործակցին Սուրիահայ Շտապ Օգնութեան եւ Վերականգնումի Մարմինին հետ, անոր տրամադրելով նիւթական թէ բարոյական ամէն աջակցութիւն: Հազարաւոր հայ ընտանիքներու եւ մանուկներու բաժնուած են սննդեղէնի տոպրակներ, կաթ, վառելանիւթ, անհրաժեշտ իրեր եւ դեղեր: Ռումբերու բեկորներէ թէ հրասանդներէ վիրաւորուած հայորդիներուն եւ կարօտեալ ընտանիքներուն ցուցաբերուած է բժշկական օգնութիւն: Կարելոր յատկացում ըրած ենք Հալէպի Նոր Գիւղ թաղամասի տուժած մեր հայրենակիցներուն: Նպաստաբաշխումներ ըրած ենք Հասաքէի, Մալիքիէի, Տեր Չօրի եւ Ռաս ուլ Այնի հայութեան: Օգնութեան հասած ենք նաեւ թրքական սահմանին մօտ ապրող սուրիահայերուն, ժամանակաւոր բնակարաններ գտնելու: ՀԲԸՄ-ի Գամիշլիի մասնաճիւղը ընդունած է սահմանային գիւղերէն փախուստ տուած հայեր:

Նոյնիսկ պատերազմական կացութեան մէջ, սուրիահայ աշակերտներ կը շարունակեն յաճախել դպրոց: Միութեանս հիմնական խնդիրն է դպրոցը: Ի գին ամէն զոհողութեան որդեգրած ենք «Ոչ մէկ հայ աշակերտ նիւթական պատճառով դպրոցէն դուրս պիտի չմնայ» կարգախօսը:

Միութիւնը սուրիահայութեան օգնութեան ծրագիրներ իրականացուցած է նաեւ Սուրիոյ սահմաններէն դուրս:



## Լիբանան

Լիբանանը առաջիններեն էր, որ ընդունած էր սուրիահայերը: Հոս անշուշտ սննդեղէնի եւ կեցութեան հարցերը հրատապ չեն, բայց կարելոր է կրթութեան հարցը: ՀԲԸՄիութիւնը նախորդ ուսումնական տարեշրջանին հոգացած է շուրջ 140 սուրիահայ աշակերտներու կրթութեան ծախսերը:

## Հայաստան

Հայաստանի մէջ ՀԲԸՄ-ի նախաձեռնութեամբ կազմուեցաւ Օժանդակ Յանձնախումբ մը, որ ժրաջան աշխատանք կատարեց Հայաստան ապաստանած հազարաւոր սուրիահայերու օգնութեան ուղղութեամբ: Սկզբնական շրջանին ՀԲԸՄիութիւնը անոնց ամսական գումար մը տրամադրեց, որ առաւելաբար օգտագործուեցաւ բնակարաններու վարձքի համար: Սուրիահայ 608 ընտանիքներ ստացան այդ նպաստը: 180 սուրիահայեր ստացած են սննդեղէնի կտրօսներ: Առողջապահութեան, դեղերու, բժշկական դարմանումի եւ հրատապ վիրահատութիւններու համար 365 կարօտեալ սուրիահայեր ստացած են օգնութիւն: Դրամական օգնութեան, մշակութային ձեռնարկներու հովանաւորութեան եւ այլ օժանդակութիւններու համար նոյնպէս միջոցներ տրամադրուած են:

Նկատի ունենալով, որ սուրիահայերէն շատեր հեռացած էին իրենց տուներէն առանց իրենց հետ ունենալու ձմեռնային հագուստներ, հրատապ դարձած էր զիրենք տաք հագուստով ապահովելու հարցը: Այս նպատակով «Սիրիահայերի Հիմնախնդիրների Համակարգման Կենտրոն»-ի հետ համագործակցաբար իրականացուցած ենք տաք հագուստի բաշխումի մի քանի ծրագիրներ, որոնցմէ օգտուած են շուրջ 1500 ընտանիքներ: Այսօր ալ կը շարունակենք նպաստ, դեղ եւ բժշկական օգնութիւն տրամադրել սուրիահայերուն:

ՀԲԸՄիութիւնը կը շարունակէ իր աջակցութիւնը բերել նաեւ «Սիրիահայերի Հիմնախնդիրները Համակարգող Կենտրոն» հասարակական կազմակերպութեան, անոր տրամադրելով գրասենեակ, ինչպէս նաեւ յանձն առնելով գրասենեակի անձնակազմի աշխատավարձերու եւ գրասենեակի պահպանման ծախսերը:

Տասնեակ սուրիահայ ընտանիքներ այժմ կը բնակին Արցախի մէջ, որոնցմէ շատեր կը զբաղին հողագործութեամբ: Այդ ընտանիքներուն աջակցելու նպատակով ՀԲԸՄիութիւնը, Չերչեան ընտանիք հիմնադրամին նուիրատուութեան շնորհիւ, նախաձեռնեց գիւղատնտեսական աջակցութեան ծրագիր մը, որով սուրիահայ մեր հայրենակիցներուն անվճար տրամադրուեցան թրաքթորներ, սերմնացաններ, պարարտանիւթերու ցրիչներ եւ այլ սարքաւորումներ: Այս ծրագիրը քաջալերանք կը հանդիսանայ որ սուրիահայ ընտանիքներ բնակութիւն հաստատեն Արցախի մէջ եւ զբաղին գիւղատնտեսութեամբ, մեծապէս նպաստելով նաեւ Արցախի տնտեսութեան զարգացման:

Հայաստանի Սփիւռքի Նախարարութիւնը, Հայաստանի Կրթութեան եւ Գիտութեան Նախարարութիւնը, Հայկական Բարեգործական Ընդհանուր Միութիւնը եւ Գալուստ Կիւպէնկեան Հիմնարկութիւնը անցեալ տարի կրթաթոշակներու միասնական ծրագիր մը իրականացուցին Հայաստանի բարձրագոյն եւ միջին մասնագիտական ուսումնական հաստատութիւններուն մէջ ուսանող սուրիահայ երիտասարդներու համար: Սուրիահայ 380 ուսանողներ 2013-2014 ուսումնական տարեշրջանին նպաստաւորուեցան այս ծրագրէն: Կը վստահեցնենք թէ 2014-2015 ուսումնական տարեշրջանին նոյնպէս այս ծրագիրը պիտի շարունակուի, որուն միջոցով մեր երիտասարդ հայրենակիցները պիտի կարենան իրենց ուսումը շարունակել հայրենիքի մէջ:

Հայաստան տեղափոխուած սուրիահայերու օգնութեան ծրագիրներուն համար ՀԲԸՄիութիւնը ցարդ տրամադրած է շուրջ 450 հազար ամերիկեան տոլար: Յառաջիկայ ժամանակաշրջանին համար ալ օգնութեան որոշ ծրագիրներ իրագործելու նպատակով գումարներ պիտի հայթայթենք:

Ձեր ուշադրութեան ներկայացնելով ՀԲԸՄիութեան կատարած աշխատանքները ի նպաստ սուրիահայութեան, միեւնոյն ատեն բարձր կը գնահատենք Հայաստանի կառա-

շար. էջ 9 →



## **ՀԲԸՄ-Ի ՆԵՐԿԱՅԱՑՈՒՑԻՉՆԵՐՈՒ ՄԱՍՆԱԿՑՈՒԹԻՒՆԸ ՀԱՅԱՍՏԱՆ-ՍՓԻՒՌ-Բ ՀԱՄԱՀԱՅԿԱԿԱՆ 5-ՐԴ ՀԱՄԱԺՈՂՈՎԻՆ**

Հայաստան-Սփիւռք Համահայկական 5-րդ Համաժողովին մասնակցելու նպատակով, Հայաստան ժամանած էին ՀԲԸՄ-ի անլիքան չորս տասնեակ ներկայացուցիչներ, որոնք իրենց մասնակցութիւնը կը բերէին թեմատիկ նիստերուն եւ նիստեր կը վարէին:

ՀԲԸՄ-ի Կեդրոնական Վարչական Ժողովի անդամներ Վազգէն Եագուպեան եւ Երուանդ Չօրեան, ՀԲԸՄ-ի Թորոնթոյի Մասնաճիւղի ատենապետուհի Քնար Պասմաճեան, ՀԲԸՄ-ՅԵԸ-ի Լիբանանի «Խօսնակ» պաշտօնաթերթի խմբագիր Համբիկ Մարտիրոսեան եւ ՀԲԸՄ-ի Հայ Երիտասարդաց Ընկերակցութեան Լիբանանի Կեդրոնական Վարչութեան անդամ Վաչէ Մելքոնեան, հանդէս եկան զեկուցումներով:

Հայաստան-Սփիւռք Համահայկական 5-րդ Համաժողովին մասնակցող ՀԲԸՄ-ի ներկայացուցիչները, համաժողովի օրերուն այցելեցին ՀԲԸՄ-ի Հայաստանի ներկայացուցչութիւն, ուր տեղի ունեցաւ խորհրդակցական հանդիպում մը համաժողովի, ինչպէս նաեւ ՀԲԸՄ-ի տարբեր կառոյցներու աշխատանքներուն առընչուող հարցերու շուրջ:

Համաժողովի աւարտին, մեր ներկայացուցիչներուն համար կազմակերպուեցաւ հրաժեշտի հանդիպում-ընթրիք, որուն ընթացքին քննարկուեցան համաժողովի արդիւնքները, ՀԲԸՄ-ի ընելիքները եւ Միութեան՝ 2015 թ. Ապրիլին Երեւանի մէջ գումարուելիք 88-րդ ընդհանուր ժողովի հարցերը:



← շար. էջ 8-էն

վարութեան, Սփիւռքի Նախարարութեան, Հայ Եկեղեցւոյ, բարեսիրական կազմակերպութիւններուն, հայրենակցական միութիւններուն, առանձին խումբերուն եւ անհատներուն գործադրած ճիգերը սուրիահայութեան օգնութեան ուղղութեամբ: Մենք կը կարծենք թէ այդ աշխատանքները համադրելու, կեդրոնացնելու եւ զանոնք անլիք նպատակային ու արդիւնաւոր դարձնելու հրամայականին առջեւ կը գտնուինք ազգովին: Միասնական ու համախմբեալ աշխատանքի մը անհրաժեշտութիւնը կը զգանք բոլորս:

Սուրիական շարունակուող պատերազմը, Իրաքի հայութեան անորոշ ճակատագիրը, Միջին Արեւելքի եւ Արաբական Աշխարհի կարգ մը երկիրներու մէջ տիրող կացութիւնն ու շրջանային ամպամած հորիզոնները մեզ կը ստիպեն պատրաստ ըլլալ դիմագրաւելու հաւանական անլիք ծանր կացութիւններ: Իբրեւ անկախ պետականութիւն եւ համահայկական կառոյցներ ունեցող ազգ, մենք պետք է մեր քաղաքական, դիւանագիտական, տնտեսական ու մարդկային հզօրանքն ու միջոցները ծառայեցնենք ծրագրուած, ուսումնասիրուած ու կեդրոնացեալ աշխատանքի մը ռազմավարութեան որդեգրումին:

Շնորհակալութիւն:



## **ԳԱՀԻՐԷԻ ՀԲԸՄ-Ի ՀԱՄԱՑԱՆՑՈՎ ԿԱԶՄԱԿԵՐՊԱԾ ՃԱՏՐԱԿԻ ԳԱՍԸՆԹ-ԱՑ-ՔՆԵՐԸ ՄԿՍԱՆ 15 ՄԱՍՆԱԿԻՑՆԵՐՈՎ**

Ուրբաթ, 17 Յուլի 2014-ին, Գահիրեի ՀԲԸՄ-ի Սաթենիկ Չազըր Մշակութային Կեդրոնին մեջ, ի ներկայությամբ 15 արձանագրուած ուսանողներու եւ հետաքրքիր սեղմ շրջանակի մը, բացումը կատարուեցաւ ճատրակի դասընթացներուն:

Հաւաքը սկսաւ համացանցով փոխանցուած, Երեւանի «Հայկական Համացանցային Համալսարան»ի (Armenian Virtual College «AVC») ղեկավարներուն բարի գալուստի խօսքերով: Ուսանողներուն շինիչ պատգամներ ուղղեցին համալսարանի հիմնադիր նախագահ՝ Տոքթ. Երուանդ Չօրեան, Արփիլե Թաւաքլեան, Աննա Ենգիպարեան եւ Յասմիկ Զալափեան:

Այս, դարձեալ համացանցով, ներկայներուն ցուցադրուեցաւ կարճ տեսերիզ մը ճատրակի դասընթացներուն մասին, որուն յաջորդեց Գահիրեի մեջ նիւթին դասաւանդման եղանակին մասին բացատրութիւն մը՝ տրուած Տիկին Աննա Տոլապճեան-Թրայեանի կողմէ (ան հաղորդակցութեան կցորդն է հայրենի Համացանցային Համալսարանի եւ Գահիրեի միջեւ):

Խօսք առաւ նաեւ ճատրակի դասընթացներու պատասխանատու ուսուցիչ Տիար Գեորգ Աւանեան:

Սոյն ձեռնարկին իր աջակցութիւնը բերած էր Տիկին Ռուպինա Ասլանեան-Նորարեւեան:

Եզիպտոսի մեջ, դասընթացները տեղի կ'ունենան Գահիրեի ՀԲԸՄ-ի եւ Երեւանի «Հայկական Համացանցային Համալսարան»ի միացեալ ջանքերով: Գահիրեի ՀԲԸՄ-ի նպատակն է վերակենդանացել այս «մտային մարզանք»ը եւ զայն կրկին ներմուծել մեր ակումբներէն ներս, կիրարկելով մեզի ընծայուած արհեստագիտական նորագոյն միջոցները:

Ինչպէս որ նախապէս յիշած էինք, վերոյիշեալ դասընթացները պիտի ղեկավարէ ՀԲԸՄ-ի վարչութեան գանձապահ եւ համակարգչային գիտութեան մասնագետ Տիար Գեորգ Աւանեան: Ան եղած է եւ է ճատրակի սիրահար մը ու երկարամեայ խաղա-



ցող մը: Ան խանդավառութեամբ ընդունեց իրեն առաջարկուած «Հայկական Համացանցային Համալսարան»ի ճատրակի ուսուցչի պաշտօնը: Ան վերոյիշեալ համալսարանէն համապատասխան փորձառութիւն ձեռք ձգած է եւ համբաւաւոր ճատրակ խաղացող՝ Նորայր Զալանթարեանի հետ բազմաթիւ բարձր մակարդակի խորհրդակցութիւններ ունենալէ ետք, պատրաստ է վարելու Գահիրեի ՀԲԸՄ-ի եւ «Հայկական Համացանցային Համալսարան»ի միացեալ յայտագիրը:

Այս ծրագրէն կրնան օգտուիլ Գահիրեի հայ համայնքին պատկանող բոլոր փափաքողները: Դասընթացները անվճար են: Անոնք համացանցով սկսած են 13 Յուլի 2014-ին: Հանդիպումները տեղի կ'ունենան շաբաթը անգամ մը, Ուրբաթ առաւօտները՝ ժամը 11-ին, Հելիոպոլսոյ Սաթենիկ Չազըր Մշակութային Կեդրոնին մեջ: Իսկ շաբթուան ընթացքին, տնային պարտականութիւնները եւ դասաւանդութիւնները կը կատարուին համացանցով:

Այսօր, ճատրակի մարզէն ներս, Հայաստան նկատուած է աշխարհի առաջնակարգ երկիրներէն մին: Այս կը քաջալերէ մեզ, Սփիւռքի մեջ, որ հետեւինք մեր հայրենիքի քայլերուն եւ մեր ազգին ապահովենք նորանոր յաջողութիւններ:

*ՀԲԸՄ-ի կայքէջէն քաղեց՝  
Անայիս Ծիգմեճեան*



## ՍՈՒՐԻԱԿԱՅՈՒԹՒՆԸ ԿՐ ՃԱՐՈՒՆԱԿԷ ԻՐ ԱՌՕՐԵԱՆ

Պարզապես կարելի է միայն հիանալ՝ ընթերցելով ՀՀԸՄ-ի Հալեպի Տեղական Մասնաժողովի «ՀԱՅԵԱՑՁ» պարբերաթերթի Յուլիս 2014-ի թիվ 61 համարը:

Սուրիոյ մէջ տիրող այս դժնդակ օրերու տարատեսակ դժուարութիւնները յաղթահարելու համար «ՀԱԲԱՏՔՈՎ ԵՒ ՆՈՒԻՐՈՒՄՈՎ» ՈՒ «ԳՈՅԱՏԵՒԵԼՈՒ ՎՃՌԱԿԱՄՈՒԹԵԱՄԲ» գիտնաժողովուրդը հերոսական մաքառումով կ'աշխատի ապրիլ որպէս սուրիահայ քաղաքացի եւ որպէս արարող հայ: Այդ կը վստահեցնէ մեզի «ՀԱՅԵԱՑՁ»-ի բովանդակութիւնը:

Սուրիոյ մեծ քաղաքներուն մէջ ՀՀԸՄ-ի վարժարաններէն եւ ակումբներէն ներս կատարուող կրթական, ազգային, թատերական, երաժշտական, գեղարուեստական, մարզական եւ առողջապահական գործունեութիւններէն լուսանկարներով պատահիկներ կը ներկայացնենք մեր ընթերցողներուն:

Խոնարհելով Անոնց կատարած աշխատանքին առջեւ, կը մաղթենք որ արդարութիւնն ու խաղաղութիւնը շուտով տիրեն ամենուրեք ու աներակ դարձած անլոյս ու ջրագուրկ վայրերը վերագտնեն իրենց նախկին բնականոն վիճակը:



Կիւլապի Կիւլպէնկեան Վարժարան - Դամասկոս Վարդանանց տօնակատարութիւն



Կիւլապի Կիւլպէնկեան Մանկապարտեզ - Դամասկոս Բարեկենդանի տօնակատարութիւն



ՀՀԸՄ-ի «Գարուն» երգչախումբ - Լաթաքիա Ապրիլեան յուշատօնի մասնակցութիւն



ՀՀԸՄ-ի Լաթաքիոյ Մասնաճիւղ Կաղանդի տօնակատարութիւն



Հայոց Ցեղասպանության 99 ամեակ - Գամիշլի «ՄԱՅՐԻԿ» ժապավենի ցուցադրություն



Հայոց Ցեղասպանության 99 ամեակ - Հալեպ Միջ-համայնքային եւ միջ-միութենական ոգեկոչում



Հ.Բ.Ը.Մ. Լ.Ն.-Գ.Կ. Միջայլ Եսայեան Մանկապարտեզ Բարեկենդանի տոնակատարություն (Հալեպ)



Հ.Բ.Ը.Մ. Լ.Նաճարեան - Գ.Կիլյալեկեան Վարժարան 7-րդ կարգ- «Ս.Վարդանանց Չօրավարաց» նշում



Հ.Բ.Ը.Մ. Լ.Նաճարեան - Գ.Կիլյալեկեան Վարժարան 10-րդ կարգի աշակերտներ - ատենամարզանք նուիրուած Դ. Վարուժանի Ծննդեան 130 եւ վարժարանի հիմնադրութեան 60 ամեակներուն



Հ.Բ.Ը.Մ. Լ.Նաճարեան - Գ.Կիլյալեկեան Վարժարան 10-րդ կարգ - «Մաքուր եւ Անսխալ Հայերէն Խօսելու Եզրափակիչ Մրցում» - 10 Մայիս 2014



Հ.Բ.Ը.Մ. Լ.Նաճարեան - Գ.Կիլյալեկեան Վարժարանաշակերտական թատրոնի ներկայացում



## ՏԱՐԻՆԵՐՈՒ ՀԱՆՐԱԳՈՒՄԱՐ



Տարիներս, տարիներս... մարդ երբ կը բոլորէ իր կես դարը եւ անելին, կը խորհի իր անցած տարիներուն մասին: Այդ պահուն է որ կը յիշէ անցած տարիներն ու օրերը, որոնք երբեք կարելի չէ ետ բերել: Արուեստագետներն ալ կը խորհին անցած տարիներուն մասին եւ կ'անկեղծանան իրենց ստեղծագործութիւններուն մէջ:

Մեծ բանաստեղծ Յամօ Սահեան կ'ըսէ՝

*Տարիներս, տարիներս,  
Ուր մնացին տարիներս,  
Կանաչ-կարմիր,  
Սեւ, սպիտակ տարիներս,  
Իմ սառն ու տաք,  
Ծուռ ու շիտակ  
Տարիներս, տարիներս :*

Կը կարծեմ թէ ամէն մարդ կը կրկնէ այս խօսքերը իր կեանքի որեւէ հանգրուանին: Արուեստագետները առաւել եւս, որովհետեւ կը գիտակցին իրենց առաքելութեան: Կը գիտակցին որ եկած են կարելոր բան մը ըսելու մարդոց, աշխարհին, պատմութեան... Գուցէ այդ է պատճառը, որ իւրաքանչիւր բանաստեղծ կը փնտռէ իր մտքի ամենէն բարձր թռիչքը, իւրաքանչիւր դերասան կը փնտռէ իր լաւագոյն կերպարը, նկարիչը՝ այն գոյնը, որ իրն է, միայն ի՛րը, արձանագործը՝ ամէն նոր արձան անար-

տելէ ետք, կը մտածէ որ դեռ չէ կերտած իր ամենէն կարելոր գործը... Եւ այս փնտրուտութիւններուն մէջ ոմանք կ'անցընեն իրենց ամբողջ կեանքը: Իսկ ոմանք՝ կ'արարեն քերթուածներ, որոնք արուեստի պատմութեան մէջ մնայուն տեղ կը գրաւեն:

Ճանչցուած արուեստագետ Սարգիս Թօսունեան վերջերս առիթը ունեցաւ բարձրաձայնելու վերը յիշուած տողերը: Տարիները եկան, անցան եւ բոլորեցին վաթսուներ: Եգիպտահայ յայտնի արուեստագետը երբեք չի ջանար թաքցնել իր տարիքը, այլ նախ ինքզինքին եւ շուրջիններուն կը փափաքի ցուցադրել իր տարիներու վաստակը: Ճիշդ է, որ ամէն տարի երկու երեք ցուցադրութիւն ունեցած է, բայց հարկ է վաթսուն տարիներու հեռաւորութենէն դիտել եւ տեսնել ստեղծագործական ընթացքը, ելելէջները, ինչու ոչ՝ նաեւ յաղթանակները: Այսօր Սարգիս Թօսունեանը Եգիպտոսի ճանչցուած արուեստագետներէն մէկն է եւ լաւագոյններէն մէկը: Անոր բարձրարուեստ գործերը կը զարդարեն Գահիրէի միջազգային օդակայանը, Աղեքսանդրիոյ գրադարանը եւ ծովեզերքը, մնայուն տեղ ունին Գահիրէի ժամանակակից արուեստի թանգարանին եւ Աղեքսանդրիոյ արուեստներու տան մեծ սրահին մէջ: Իսկ հայ-եգիպտական բարեկամութեան արձանը բազմած է մայրաքաղաքի կեդրոնական պարտեզին մէջ:



Արուեստագետը բազմիցս արժանացած է մետալներու, խրախուսական պատուոյ գիրերու, պետական պարգեւներու եւ այլն: Կը կարծեմ թէ ան վաթսուն տարիներու հեռաւորութենէն իրաւունք ունի հայեացք մը նետելու իր անցած բեղմնաւոր ճանապարհին:

Ամբողջ տարին, ոչ պաշտօնապէս, կարծես թէ յայտարարուեցաւ ցուցադրութիւններու տարի, եւ իրարու յաջորդեցին նախարարութեան, Գահիրէի արուեստագետներու, Աղեքսանդրիոյ արուեստագետներու, Աղեքսանդրիոյ Աթէլիէի, գրադարանի, Գահիրէի (Սաֆարխան) ցուցասրահին, Եգիպտացի մեծ գրող Ահմետ Շաուքիի անուան մշակութային կեդրոնին մէջ անհատական ցուցադրութիւններ, որոնք բազմամարդ էին, եւ ոչ միայն բացումի օրերուն: Այս ցուցադրութիւններուն ներկայ գտնուեցան Եգիպտոսի մշակոյթի նախարարը, փոխնախարարներ, կերպարուեստի բաժիններու վարիչներ, թանգարաններու եւ ցուցասրահներու տնօրէններ, արուեստի եւ մշակոյթի վարպետներ, արուեստասեր լայն հասարակութիւն եւ մեծ թիւով երիտասարդութիւն:

Յաւալի է միայն, որ այլազգի արուես-

տագետներ ու արուեստասերներ առաւել հետաքրքրուած էին մեր արուեստագետով ու անոր ստեղծագործութիւններով, քան մենք, որ շատ հպարտանալու առիթներ կրկանք ունենալ...

Շատ անհատական ցուցադրութիւն մը եղաւ, նուիրուած ծննդեան վաթսունամեակին, բայց դարձեալ ցաւով պիտի նշեմ որ հայկական որեւէ ակումբ չիշեց թէ մեր սիրելի Սարգիսը վաթսուն տարեկան է:

Ցուցադրութիւնները տարբեր թեմաներով էին՝ տարբեր տարիներու ստեղծագործութիւններէ, տարբեր նիւթերէ՝ պրոնզ, քար, կրանիթ, պազալտ, ալիւմին, կապար, փայտ եւ այլն: Բազմաթիւ ցուցադրութիւններուն մէջ կ'առանձնացնէի Ահմետ Շաուքիի անուան մշակութային կեդրոնին մէջ եղած ցուցադրութիւնը: Այստեղ ցուցադրուած էին արձանագործին առաջին գործերէն մինչեւ վերջին ստեղծագործութիւնները: Վերջինը չէր, բայց կարծես կ'ամփոփէր արձանագործին մինչեւ այսօրուան անցած ուղին: Արքաներ, նազելի օրիորդներ, կապանքներ չհանդուրժող երիտասարդ, փրփրաճերմակ մարմարէ ծովահարս, փայտէ համեստ մարդուկ, թագակիր ու անթագ արքայադուստրեր, ներկան ու պայծառ ապագան շողկապող արուեստագետներ... կրկանք

շարունակել իսկական արուեստագետի վաթսուն տարիներու աշխատանքներուն բեղմնաւոր ցուցակը: Բայց գլխաւորը այդ չէ: Կարելորդ այն է որ՝ թէ՛ անհատական ցուցադրութեան կը պատրաստուի, թէ՛ միջազգային պիտակներու, թէ՛ խմբային ցուցադրութեան, միեւնոյն է, ան կ'աշխատի արուեստագետի իր բարձր ճաշակով, արձանագործի վարպետութեամբ, հայ մարդու նրբանկա-





տուրքեամբ...:

Արուեստագետ Սարգիս Թօսունեան կը մտածէ, թէ արուեստը հոգիով կը կերտուի: Կը կարծեմ արուեստը աչքով կը դիտուի, բայց հոգիով կը հասկցուի: Կը նշանակէ արուեստը հոգիներու երկխօսութիւն է: Մարդ ամէն ինչ չի՛ կրնար ըսել բարձրածայն, բայց արուեստագետին առաւելութիւնն այն է, որ ան կրնայ իր արուեստի միջոցով կերտել իր ըսելիքը: Գաղափար, որ չես ըսեր աշխարհին, շուրջիներուդ, շունչ կ'առնէ անխօս քարի, պղինձի, կամ որեւէ անշունչ առարկայի մէջ:

Եգիպտահայ ճանչցուած արձանագործ Սարգիս Թօսունեան իր բազմաթիւ ցուցադրութիւններով կը փաստէ որ ստեղծագոր-

ծելու առաջին օրէն մինչ օրս, պահպանած է արուեստի նկատմամբ իր ազնուութիւնը, հաւատարմութիւնը, կայուն դիմագիծը, բարձր ճաշակը...: Ան հաւատարիմ է իր որդեգրած սկզբունքներուն, կը քալէ ստեղծագործողի լուսեղէն ճանապարհով եւ կը կերտէ արուեստագետի ի՛ր կերպարը՝ ճաշակաւոր եւ բարձրարուեստ:

Տարիները եկան, անցան, բայց ո՛չ պարապ, ո՛չ անպտուղ: Լեցուն ու բովանդակալից: Թող գալիք բոլոր տարիներն ալ ւաւելի բերրի ու բեղմնաւոր ըլլան, պայծառ գաղափարներով լի...:

Թող բարով գան տարիները, տարիները...:

*Անժիկ Յակոբեան-Կանիմեան*





## «ԱՐՑԱԽ» ԵՐԳՉԱԽՈՒՄԲԸ ՀԱՅՐԵՆԻ-ՔԻ ՄԷՋ

Ապրիլ 30-ին, մեր դպրոցական քննական շրջանի առաջին օրը, «Արցախ» երգչախումբով տնօրենին քով կանչուեցանք, ուր մեզի կը սպասէին Գալուստեան-Նուպարեան Ազգային Վարժարանի տնօրեն՝ Պրն. Սիմոն Չամբերթեանեան եւ մեր երգչախումբի գեղարուեստական ղեկավար՝ Մօ. Միհրան Ղազէլեան: Անոնք յայտնեցին թէ մեր նորաստեղծ երգչախումբը ամառնային արձակուրդներուն 2 շաբաթով հայրենիք պիտի մեկնի՝ «Իմ Հայաստան» Համահայկական 2-րդ փառատօսին մասնակցելու համար:

Աննկարագրելի ոգեւորութիւն էր բոլորիս համար: Այնքա՛ն ուրախ էինք եւ կը գիտակցէինք մեր ուսերուն դրուած մեծ պատասխանատուութիւնը՝ եգիպտահայ գաղութը պատշաճ ձեւով ներկայացնելու եւ անոր անունը բարձր պահելու: Մեզի կը սպասէր ծանր աշխատանք մը: Մինչ մեր դասընկերները կը վայելէին ամառնային արձակուրդը, մենք պիտի տքնաջան աշխատէինք:

Վերջապէս երկու ամիս՝ շաբաթական 3-4 փորձերէ ետք, Յուլիս 28-ին «Արցախ»ը հայրենիք մեկնեցաւ: Հայաստան հասնելուն պէս, օդանաւակայանէն ուղղուեցանք դէպի Արցախ, սակայն քանի որ ճամբան շատ երկար էր, գիշերեցինք Եղեգնաձորի մէջ, իսկ առտուն շարունակեցինք մեր ուղեւորութիւնը՝ այցելելով նաեւ Զերմուկ ու Տաթեւ: Երեկոյեան ժամը 7-ին Հայաստան-Արցախ սահմանին վրայ էինք, եւ զոյգ երկիրներուն դրօշակներուն առջեւ շարուած՝ կ'երգէինք ազատ ու անկախ Արցախի հիմը:

Յուլիս 30-ի առտուն այցելեցինք Ասկերանի բերդ, Արցախի խորհրդանիշ հանդիսացող «Մենք ենք Մեր Սա-

րերը» յուշարձան եւ Շուշիի Ղազանչեցոց եկեղեցին, ծանօթացանք եկեղեցւոյ պատմութեան եւ ճարտարապետական գաղտնիքներուն, ապա օրհնութիւն ստացանք մեր անդրանիկ մենահամերգին համար, որ հետաքրքրական զուգահիշակութեամբ տեղի պիտի ունենար Արցախի մէջ:

Այստեղ կ'ուզեմ պատմել թէ ինչպէս այս մենահամերգէն չորս ամիս առաջ մեր նորաստեղծ, սակայն արդէն որոշակի փորձ ձեռք բերած երգչախումբը «Արցախ» անուանուեցաւ:

ԳՆԱՎ-ի 2012-2013-ի շրջանաւարտներու հանդէսին, մենք՝ առաջին եւ երկրորդ երկրորդականի աշակերտներս, առանձին ելոյթ ունեցանք Ա. Գրիգորեանի «Արցախ» երգով: Յունուար 6-ի երիտասարդական փառատօսին եւս առիթը ընձեռուեցաւ մեզ ելոյթ ունենալու, եւ մենք մէկ անգամ եւս այդ երգով հանդէս եկանք: Իսկ երբ դպրոցը Մարտին պիտի մասնակցէր Uptown Stars Talent Show-ին, կրկին մեզ առաջարկուեցաւ ներկայացնել դպրոցը: Սակայն այս անգամ արդէն ներհամայնքային բեմ չէր, ուստի պէտք էր անուն մը որոշէինք, որով պիտի ներկայանայինք: Բոլորս, մեր ղեկավարին հետ միաձայն, որոշեցինք որ խումբին անունը «Արցախ» պէտք է ըլլար: (Յետագային մեր խումբը համալրուեցաւ





դպրոցի պատրաստական բաժնի 8 աշակերտներով, որոնց հետ ելոյթ ունեցանք Ապրիլին, Եղեռնի 99-ամեակի ոգեկոչման առիթով մեր դպրոցի կազմակերպած հանդիսութեան):

Եւ ահա, քանի մը ամիս անց «Արցախ» իր անդրանիկ մենահամերգը կ'ունենար Շուշիի Գեղարուեստի Պետական Պատկերասրահի դահլիճին մէջ: Յուզիչ էր գտնուիլ հերոսներու հողին վրայ, ներկայացնել մեր փոքր գաղութը եւ զգալ հիւրընկալ արցախցիներու ջերմութիւնը:

Երբ հասանք համերգասրահ, քաջալերական վանկարկումներով մեզ դիմաւորեց Շուշիի «Վարանդա» մանկապատանեկան երգչախումբը: Կարճ փորձէ մը ետք, սկսաւ մեր համերգը, որուն ներկայ էին Արցախի եւ Եգիպտոսի թեմի առաջնորդները, Շուշիի քաղաքապետը, Շուշիի Մշակութային Վարչութեան պետը եւ արցախցի երաժշտասերներ: Համերգը անցաւ շատ յուզիչ եւ ուրախ մթնոլորտի մը մէջ: Երգեցինք 16 երգ, իսկ համերգի աւարտին «Վարանդա»ի հետ միասնաբար կատարեցինք երկու երգ՝ «Մեր Սիրելի Երեւան» (խմբավարութեանը մեր ղեկավար՝ Միհրան Ղազէլեանի) եւ «Երազ Իմ Երկիր» (խմբավարութեանը «Վարանդա»ի ղեկավար՝ Չաքար Բէշիշեանի, որուն ջանքերով կազմակերպուած էր համերգը):

րապ եւ ուշ երեկոյեան Երեւան հասանք:

Օգոստոս 1-ին տեղի ունեցաւ «Իմ Հայաստան» 2-րդ փառատօնի բացման համերգը, Երեւանի Ալ. Սպենդիարեանի Անուան Օփերայի եւ Պալետի Ակադեմական Թատրոնի Արամ Խաչատրեան մեծ սրահին մէջ: «Երգչախումբային Արուեստի Օրեր»ու բոլոր մասնակից երգչախումբերը հանդես եկան մէկ երգով: Մենք երգեցինք «Մեր Սիրելի Երեւան»ը: Համերգը եզրափակուեցաւ Հայաստանի Պետական Երգչախումբի եւ բոլոր մասնակից երգչախումբերուն կողմէ Արա Գեորգեանի՝ Հայոց Ցեղասպանութեան 100-ամեակին նուիրած «Յիշում Ենք» երգի միասնական անդրանիկ կատարումով: Մեծ հպարտութիւն էր երգել այդ մեծ բեմին վրայ՝ աշխարհի չորս ծագերէն եկած 500 հայրենակիցներու հետ, խմբավար ունենալով մէկը, որուն մասին շատ լսած էի հորմէս եւ շատ տեսած էի հեռատեսիլէն՝ Հայաստանի Ժողովրդական Արտիստ՝ Սօ. Յովհաննէս Չօքիճեան, որուն 85-ամեակին նուիրուած էր փառատօնին բացման հանդիսութիւնը:

Յաջորդ օրը կ'եսօրին, երաժշտական ընկերութեան դահլիճին մէջ, հանդիպում ունեցանք ՀՀ երգչախումբային արուեստի մեծերուն հետ: Իսկ երեկոյեան ժամը 7-էն Ծիծեռնակաբերդի յուշահամալիրին մէջ տեղի ունեցաւ «Յիշում Ենք» եւ «Remember» երգերու տեսահոլովակի



Յաջորդ առտու այցելեցինք Ճտըրտիւզ եւ անոր գեղեցկութեամբ զմայլած՝ նոր եռանդով ու ոգեւորութեամբ ուղղուեցանք դէպի Երեւան: Ճամբուն վրայ առիթը ունեցանք այցելելու Շաքիի ջրվեժը ու Խոր Վի-

սկարահանումը՝ փառատօնի բոլոր երգչախումբերուն մասնակցութեամբ: Նկարահանումը վերջացաւ գիշերուայ 12-ին: Բոլորս ոգեւորուած եւ հրպարտ էինք Ցեղասպանութեան 100-ամեակի ոգեկոչման միջոցառումին մեր մասնակցութեան բաժինը բերելուն համար:

Օգոստոս 3-ի առտուն՝ «Կոմիտաս», «Ովսաննա» եւ «Նորահրաշ» երգչախումբերուն հետ այցելեցինք Հառիճավանք, ապա ուղղուեցանք Հայաստանի երկրորդ քաղաք՝ Գիւմրի, ուր երեկոյեան ելոյթ ունե-



ցանք Վարդան Աճեմեանի անուան դահլիճին մէջ, ներկայացնելով 6 երգ՝ «Արցախ», «Յիմօ՛ Էլ Լռեմք», «Ու՛ր Կ'երթայ Մանկութիւնը», «Ահսան Լաս» (արաբերէն), «Յայաստան» եւ «Էրեբունի-Երեւան»:

Յաջորդ օրը՝ Օգոստոս 4-ի առաւօտեան, մինչ մեր խմբավարը եւ դպրոցի տնօրէնը հանդիպման էին Սփիւռքի Նախարարութեան մէջ, մենք՝ վոքալի պատասխանատու Տիկ. Գոհար Ղազէլեանի գլխաւորութեամբ, այցելեցինք Սբ. Յովսէփմէ, Սբ. Գալիանէ եւ Սբ. Էջմիածին: Երեկոյեան, «Իմ Յայաստան» 2-րդ փառատօնի Սփիւռքէն ժամանած երգչախումբերուն հետ, համերգ ունեցանք Երեւանի Աննօ Բաբաճանեանի անուան համերգասրահին մէջ՝ կատարելով «Մանկանց Լուսէ Երազը», «Երազանք Մը Պահէ» եւ «Ժպտէ» երգերը:

5 Օգոստոսին փառատօնին փակման



հանդիսութիւնն էր Սունդուկեանի անուան թատրոնին մէջ: Վերջին բեմելն էր հայրենիքի մէջ, եւ մենք եզրափակեցինք մեր հայաստանեան ելոյթները Կոմիտասի «Էսօր Ուրբաթ Է» եւ «Երեւան Բաղ Եմ Արել» երգերով: Յամերգի աւարտին, բոլոր երգչա-

խումբերուն պատուոյ գիրքը յանձնուելէ վերջ, միասնաբար կատարեցինք «Երեւան-Էրեբունի» երգը:

Օգոստոս 6-ին շարունակեցինք այցելութիւնները Յայաստանի տեսարժան վայրեր՝ Ծաղկաձոր, Կէչառիս վանական համալիր, Սեւանավանք, Յաղարծին եւ Աբովեանի նորակառոյց Սբ. Յովհաննէս եկեղեցի:

Օգոստոս 7-ը մեր վերջին օրն էր Յայաստանի մէջ, ուստի առտուն պտղոտեցանք Երեւանի գեղեցիկ փողոցները, իսկ կէսօրէ ետք այցելեցինք ԹՈՒՄՕ Ստեղծարար Տեխնոլոկիաներու Կեդրոն: Ծատ լսած էինք այդ հեքիաթային վայրին մասին, սակայն մեր աչքերով տեսնելը ուրիշ էր: Բարի Նախանձով կը Նայէինք կեդրոնին աշակերտներուն եւ անոնց ստեղծած աշխատանքներուն: Ուրախալի է, որ այդպիսի հետաքրքրական կեդրոն մը կը գործէ Յայաստանէն ներս, որ հայ ժողովուրդին կու տայ զարգացած, խելացի եւ լայն մտածողութեան տեր սերունդ մը:

Օգոստոս 8-ին վերջացաւ մեր այցը Յայաստան, որ Նաեւ Նպատակ մը կը հետապնդէր՝ մայր հայրենիքէն ներս ներկայացնել մեր գաղութը եւ ապացուցել որ թեւեւ Եգիպտոսի մէջ հայութեան թիւը Նուազած է եւ գաղութը ձուլման ինդիքին առջեւ կանգնած է, սակայն դեռ կը գոյատեւէ եւ մենք՝ եգիպտահայ պատանիներս, մեր հայրենիքէն հազարաւոր մղոններ հեռու, հասակ կը Նետենք հայկական շունչով եւ կ'ապրինք հայկական մշակոյթով:

Գրութեանս վերջաւորութեան կ'ուզեմ «Արցախ»ի անունէն խորին շնորհակալութիւն յայտնել բոլոր անոնց, որոնք իրականութիւն դարձուցին մեր այցը հայրենիք՝ Գահիրէի Ազգային Իշխանութեան, Գալուստեան Նուպարեան Ազգային Վարժարանի տնօրէնութեան եւ մեր երգչախումբի ղեկավարներուն:



*Լուսածին Ղազէլեան*



## ՄԱՀ ԵՒ ՅՈՒՂԱՐԿԱՎՈՐՈՒԹՅՈՒՆ ԳԷՈՐԳ ՓԻԼԻԿԵԱՆԻ



Խոր ցաւով կը գուժենք մահը, ԶԲԸՄ-ի Աղէքսանդրիոյ Մասնաճիւղի երկարամեայ անդամ, կրկնակի վեթերան եւ նախկին վարչական Գեորգ Զմայեակ Փիլիկեանի, որ հրաժեշտ տուաւ այս աշխարհին Շաբաթ, 4 Զոկտեմբեր 2014-ին, խոր սուգի մատնելով իր վշտահար Տիկինը՝ Լուսի Մածունեան Փիլիկեանը, հարազատները եւ աղէքսանդրահայ գաղութի անդամները:

Ան մաս կը կազմէր Աղէքսանդրիոյ Պատկառելի Թեմական Ժողովին աւելի քան քառասուն տարիներ: Եղած է Պատուարժան Բաղաքական Ժողովի փոխ ատենապետ, Տիգրան Երկաթ Զայ Մշակութային Միութեան պատուոյ ատենապետ եւ «Արեւ» ի լայն շրջանակի Աղէքսանդրիոյ առաջատար դէմքերէն:

Ազգային յուղարկաւորութեան տխուր արարողութիւնը տեղի ունեցաւ յաջորդ օրը, 5 Զոկտեմբեր 2014-ի յետ միջօրէի ժամը 1-ին, Շաթափի Ազգային Գերեզմանատան Ս. Գեորգ Սատրան մէջ եւ նոյն օրը ցաւակցութիւնները ընդունուեցան Աղէքսանդրիոյ Ազգային Առաջնորդարանին մէջ:

**«Տեղեկատու»ն իր վշտակցութիւնը կը յայտնէ հանգուցեալին այրիին՝ Տիկին Լուսի Մածունեան Փիլիկեանի, հարազատներուն եւ սգակիր բոլոր պարագաներուն:**

Կիրամուտը տեղի ունեցաւ Շաբաթ, 11 Զոկտեմբեր 2014-ին, յետ եկեղեցական արարողութեան, իր սրտին ամենամօտիկ վայրին՝ Ազգային Առաջնորդարանին մէջ:

Հանգուցեալը բարոյապէս եւ նիւթապէս սատար հանդիսացած է Աղէքսանդրիոյ մշակութային եւ մարզական կառոյցներուն ու նամանաւանդ իր շատ սիրելի Տիգրան Երկաթ Զայ Մշակութային Միութեան:

Գեորգ Փիլիկեան, միշտ գերադասած է ազգային շահերը: Ան իր համեստ եւ ժրաջան բնաւորութեամբ վայելած է սերը եւ յարգանքը բոլոր իր գործակիցներուն, եղած է համագործակցութեան ջատագով: Իր ազգանուէր եւ անշահախնդիր գործունեութեամբ միշտ սատար հանդիսացած է աղէքսանդրահայ գաղութի վերելքին:

Եգիպտոսի ասպնջական հողը թեթեւ թող ըլլայ իր յոգնատանջ ոսկորներուն վրայ եւ Աստուած արդարներու դասին մէջ հանգչեցնէ իր հոգին:

*Նազարէթ Գարթալեան  
Աղէքսանդրիա*



## ՀԱՐՄ ԿԱՄՔԻ 2014-Ի ՏԱՐԵԿԱՆ ՄՐՑԱՇԱՐՔԸ

Ուրբաթ 29, Շաբաթ 30 եւ Կիրակի 31 Օգոստոս 2014-ին, Աղեքսանդրիոյ ՅՄԸՍ Կամքը կազմակերպեց իր ամենամեայ Եգիպտահայ Պասքէթ պոլի Մրցաշարը, մասնակցութեամբ Գահիրէէն եւ Աղեքսանդրիայէն հինգ մարզական ակումբներու:

Մրցումները կը վայելէին Եգիպտոսի Յայոց Թեմի Բարեխնամ Առաջնորդ Գերշ. Տ. Աշոտ Եպս. Մնացականեանի հովանաւորութիւնը եւ Տէր եւ Տիկին Վահէ Պէն-Օհանեանի նախագահութիւնը:

Աղեքսանդրիոյ ՅՄԸՍ ՆՌԴԱՐԻ եւ Սրբուհի Թերեզայի միջեւ մրցումը տեղի ունեցաւ Ուրբաթ օրը: Երկու խումբերն ալ իրենց կարելին ըրին յաղթանակ արձանագրելու համար: Խաղարկութիւնը լաւ էր ու հետաքրքրական, մանաւանդ որ մրցումին ամբողջ տելոդութեան արձանագրուած արդիւնքին տարբերութիւնը բաւա-

կալ ՅՄԸՍ Կամքին միջեւ էր: Երկու խումբերն ալ կարողացած էին իրենց երեց մարզիկներուն հետ դաշտ իջեցնել պատանիներ, որոնք թեպէտ սկսնակ՝ սակայն աշխոյժ էին ու խանդավառ: Մրցումը ակնկալածէն շատ անելի հետաքրքրական էր, մանաւանդ որ Կամքի տղաքը թիւի տարբերութիւնը նուազեցուցին եւ մինչեւ իրաւարարին սուլիչին հնչելը յայտնի չէր թէ ո՞վ պիտի ըլլար յաղթականը: Սակայն Աղեքսանդրիոյ ՅՄԸՍ ՆՌԴԱՐԻ տղաքը, մէկ կէտի առաւելութեամբ՝ 53-52, արժանի եղան Կիրակի օրուան աւարտականին հասնելու:

Երկրորդ մրցումը Գահիրէի ՅՄԸՍ ՆՌԴԱՐԻն եւ ՅՄԸՍ Արարատին միջեւ էր, որ ինչպէս միշտ սկսաւ մեծ լարուածութեամբ. երկու մրցակիցներու կողմէ կատարուած իրերայաջորդ յարձակումներ ու արձակումներ՝ ոմանք յաջող, իսկ ուրիշներ օղակէն դուրս, մարզիչներուն բարձրաձայն ու ջղային դիտողութիւններ, իրաւարարներուն սուլիչներ ու մարզասերներուն անթարթ ուշադրութիւն:

Երկրորդ քառորդախաղին կը մնար երկու վայրկեան եւ ՅՄԸՍ Արարատը 13 թիւի առաւելութիւն կ'արձանագրէր 43-30 արդիւնքով, երբ ծագեցաւ օրուան միջադէպերուն առաջինը:

Իրաւարարին վճիռէն դժգոհ, Արարատի համակիր մը, բարձրաձայն դիտողութիւն ըրաւ, ու երբ

իրաւարարը դիտել տուաւ իրեն որ ան իրաւունք չունէր խօսելու, ծայր առաւ վիճաբանութեանց շարքը: Մրցումը ընդհատուեցաւ անելի քան տասնհինգ վայրկեան, որուն ընթացքին ՅՄԸՍ Կամքի եւ ՅՄԸՍ Արարատի պատասխանատուները



կան սակաւ էր: Այս տաք խաղը աւարտեցաւ ի նպաստ Աղեքսանդրիոյ ՅՄԸՍ ՆՌԴԱՐԻն՝ 74-70 արդիւնքով:

Շաբաթ օրուան երկու մրցումներուն առաջինը նախորդ օրուայ յաղթական՝ Աղեքսանդրիոյ ՅՄԸՍ ՆՌԴԱՐԻն եւ հիւրըն-



բանակցեցան եւ բողոքող հանդիսատեսը դուրս առաջնորդեցին ու խաղը շարունակուեցաւ:

Երրորդ քառորդախաղէն սկսեալ, Գահիրէի ՅՄԸՄ ՆՈՒՊԱՐԻ մարզիկները փոխելով իրենց խաղաձեւը, կարողացան թիւի տարբերութիւնը նուազեցնել, սակայն միշտ լարուածութիւն կար ՅՄԸՄ Արարատի մարզիչին եւ իրաւարարներուն միջեւ, քանի որ առաջինը տեսաբար դժգոհութիւն կը յայտնէր անոնց վճիռներուն նկատմամբ:

Մրցումին աւարտին կը մնար չորս վայրկեան եւ արդիւնքն էր 56-52՝ ի նպաստ ՅՄԸՄ Արարատի: Գահիրէի ՅՄԸՄ ՆՈՒՊԱՐԻ տղաքը, թեպէտ ուշ, սկսած էին տիրապետել խաղին ու շատ հաւանական էր որ շուտով խաղը ի նպաստ իրենց պիտի դառնար, երբ իրաւարարներէն մին մարզիչներուն միջամտութենէն համբերութիւնը հատած ըլլալով, խաղը դադրեցուց ու սուլիչը մէկդի դնելով մրցումը չեղեալ նկատեց՝ ի զարմանս խաղացողներուն ու դիտողներուն:



ՅՄԸՄ Կամբի պատասխանատուները կրկին բանակցեցան, այս անգամ իրաւարարներուն հետ ու խնդրեցին որ յետս կոչեն իրենց վճիռը, որպէսզի մրցումին մնացեալ չորս վայրկեանները խաղացուին ու մրցաշարքը չխանգարուի: Երկար վիճաբանութիւններէ ետք, իրաւարարները յօժարեցան խաղը շարունակել:

Գահիրէի ՅՄԸՄ ՆՈՒՊԱՐԻ տղաքը դաշ-

տէն դուրս կը սպասէին վճիռին, իսկ ՅՄԸՄ Արարատի տղաքը մէջտեղ չկային: Իրաւարարները երեք վայրկեան պայմանաժամ տուին որ խումբերը դաշտ իջնեն: Մինչ Գահիրէի ՅՄԸՄ ՆՈՒՊԱՐԻ տղաքը դաշտ իջան ու պատրաստուեցան խաղը շարունակելու, ՅՄԸՄ Արարատի մարզիկները, մարզիչը, պատասխանատուն ու համակիրները անվերադարձ հեռացած էին ակումբէն: ՅՄԸՄ Արարատի բացակայութիւնը անբացատրելի էր, ուստի իրաւարարը զայն խաղէն քաշուած նկատեց ու Գահիրէի ՅՄԸՄ ՆՈՒՊԱՐԻ՞ յաղթական:

Կէս գիշերը շատոնց անց էր արդէն, երբ սկսաւ խորովածի եւ աղցաններու ազատ շքասեղանին սպասարկութիւնը Յառաջդիմասերի պարտեզին մէջ:

Կիրակի օրուան աւարտականը երկու ՅՄԸՄ ՆՈՒՊԱՐԻներուն միջեւ էր: Աղէքսանդրիոյ խումբը խաղաց իր երրորդ մրցումը երեք օրուայ ընթացքին եւ մինչեւ երկրորդ քառորդախաղին աւարտը առաւելութիւն արձանագրած էր 43-41 արդիւնքով, զարմանք ու հիացում պատճառելով բոլորին: Գահիրէի ՅՄԸՄ ՆՈՒՊԱՐԻ խաղը վստահած էր պատանի մարզիկներուն, սակայն երրորդ կիսախաղէն սկսեալ խումբին լաւագոյն մարզիկները դաշտ իջան, ցոյց տուին խումբին իսկական մակարդակը, հաւասարեցան, անցան ու յաղթեցին 84-76 արդիւնքով:

Տիկին Սոնիա Շահպագեան, իր նուիրած բաժակը՝ ի յիշատակ ողբացեալ Նուպար Շահպագեանի, Գահիրէի ՅՄԸՄ ՆՈՒՊԱՐԻ տղոց յանձնեց:

Շնորհակալութիւն խումբին պատասխանատու Յակոբ Գարակէօզեանին, օգնական Զրիս Սիմոնեանին, մարզիչ Ամր Աշուրին եւ օգնական Ալաա Չահրանին, իրենց տարած աշխատանքին համար: Թող անոնց առաջնորդութեամբ խումբը յաղթանակէ յաղթանակ անցնի:

*Սօսի Ներտեան-Յակոբեան*



## **ՀԵԼԻՈՊՈԼՍՈՅ ՀՄԸՄ ՆՈՒՊԱՐԻ 2014-Ի ՄՐՑԱՇԱՐ-ԲԸ**

Հինգշաբթի 23, Ուրբաթ 24 եւ Շաբաթ 25 Յոկտեմբեր 2014-ին, տեղի ունեցաւ Զելիոպոլսոյ ԶՄԸՄ ՆՈՒՊԱՐԻ տարեկան Եգիպտահայ Պասքէթ պոլի Մրցաշարքը, հովանաւորութեամբ Եգիպտոսի Հայոց Թեմի Բարեխնամ Առաջնորդ Գերշ. Տ. Աշոտ Եպս. Մնացականեանի եւ նախագահութեամբ Տէր եւ Տիկին Հրաչ Սիմոնեանի՝ Պատուոյ Ատենապետ Զելիոպոլսոյ ԶՄԸՄ ՆՈՒՊԱՐԻ:

Ակումբին 16 տարեկանէն վար աղջիկներու խումբը մրցաշարքին բացումը կատարեց Ալ Չուհուրի դէմ խաղալով: Տասնչորս պարմանուհիներէ բաղկացած այս խումբը, Տիկին Սեւան Տրդատեանի ղեկավարութեամբ ու մարզիչ Մակետ Ահմետի ճիգերով, ներկաներուն հրամցուց հետաքրքրական խաղ մը, յաղթական հանդիսացաւ 38-26 արդիւնքով ու ստացաւ Տէր եւ Տիկին Գերշ. Աւանեանի նուիրած բաժակը:

Օրուան երկրորդ մրցումը ԶՄԸՄ Արարատին եւ Սրբուհի Թերեզայի երեք տղոց խումբերուն միջեւ էր: Խաղը սկսաւ տկար ու ԶՄԸՄ Արարատի տղոց անփոյթ խաղարկութիւնը յոյսի նշոյլ մը ներշնչեց Սրբուհի Թերեզայի տղոց, որոնք կարողացան մինչեւ երկրորդ քառորդախաղին աւարտը առաւելութիւն արձանագրել: Սակայն հետըզհետէ ԶՄԸՄ Արարատի տղոց երեք թիւ արժող արձակումներուն շնորհիւ, արդիւնքի տարբերութիւն մը ստեղծուեցաւ ու մրցումը աւարտեցաւ 56-37 ի նպաստ ԶՄԸՄ Արարատին:

Ուրբաթ օրուան յայտագիրը բաւական ճոխ էր: Առաջին մրցումը սկսաւ իրիկուայ ժամը 7:30-ին՝ ԶՄԸՄ Կամբին եւ հիւրընկալ խումբին միջեւ: Մակարդակի մեծ տարբերութիւն ըլլալուն, Զելիոպոլսոյ ԶՄԸՄ ՆՈՒՊԱՐԻ մարզիչը առաջին քառորդախաղէն վերջ գրեթէ ամբողջ խաղը վստահեցաւ պատանի մարզիկներուն: Մրցումը աւարտեցաւ 86-36 արդիւնքով ի նպաստ Զելիոպոլսոյ ԶՄԸՄ ՆՈՒՊԱՐԻին:

Ապա տեղի ունեցաւ Եգիպտահայ մրցաշարքերուն համար աննախադէպ՝ տղոց խումբերուն կողքին, երկու հայկա-

կան ակումբներու աղջիկներու խումբերու մրցումը: ԶՄԸՄ ՆՈՒՊԱՐԻ հրաւերը ԶՄԸՄ Արարատին կողմէ վերջապէս ընդունուելուն շնորհիւ, տարիներէ ի վեր սպասուած հանդիպումը Զելիոպոլսոյ ԶՄԸՄ ՆՈՒՊԱՐԻ եւ ԶՄԸՄ Արարատի երեք աղջիկներուն միջեւ, կայացաւ:

Հակառակ որ ԶՄԸՄ ՆՈՒՊԱՐԻ աղջիկները իրենց սովորական մակարդակէն նուազ խաղարկութիւն ցուցաբերեցին, սակայն միշտ առաւելութիւն ապահոված էին: Զիդերու պրկուածութիւնը, երկու խումբերուն պարագային ալ, բազում անյաշող արձակումներու պատճառ կ'ըլլար: Օրուան աստղը կրնանք նկատել ԶՄԸՄ ՆՈՒՊԱՐԻ մարզիկուհի Նայիրի Յակոբեանը, որ արագ ու ինքնավստահ խաղով իր խումբին յաղթանակը ապահովեց: Մրցումը աւարտեցաւ ի նպաստ հիւրընկալ խումբին՝ 35-28 արդիւնքով ու ԶՄԸՄ ՆՈՒՊԱՐԻ յաղթական աղջիկները ստացան Տոքթ. եւ Տիկին Վիգէն Ճիգմեճեանի նուիրած բաժակը: Այսպիսով, այս տարի մարզասեր հասարակութիւնը հայ իգական սեռի առաջին մրցումը վայելեց:

Դժբախտաբար Զելիոպոլսոյ ԶՄԸՄ ՆՈՒՊԱՐԻ խումբէն կը բացակայէին պասքէթ պոլի սիրահար ու աւելի քան 35 տարուայ նուիրեալ մարզիկուհի Մարլօ Սիմոնեան՝ ծունկի վնասման պատճառով, նաեւ Նաւար Գալընեան՝ փորձի ժամանակ ցուցամատը ճաթած ըլլալուն պատճառով:

Գնահատելի է Զելիոպոլսոյ ԶՄԸՄ ՆՈՒՊԱՐԻ վարչութեան՝ ամէն տարի բոլոր ակումբներուն աղջիկներու խումբերուն հրաւերներ ուղարկելու պատրաստակամութիւնը:

Վարձքը կատար երեք աղջիկներու խումբին պատասխանատու Սօսի Ներետեան-Յակոբեանին, մարզիչ Ալաա Չահրանին եւ օգնական մարզիչ Մակետ Ահմետին, իրենց տարած աշխատանքին համար:

Օրուան վերջին մրցումը Աղեքսանդրիոյ ԶՄԸՄ ՆՈՒՊԱՐԻին եւ նախորդ օրուայ յաղթական ԶՄԸՄ Արարատին միջեւ էր: Սկիզ-



բէն յայտնի էր որ ՅԱԸՍ Արարատի մարզի-  
չը իր լաւագոյն մարզիկները կը խնայէր յա-  
ջորդ օրուան աւարտականին համար: Եր-  
կու խումբերն ալ շատ խոնարհ խաղարկու-  
թիւն ցուցաբերեցին ու չկարողացան մար-  
զասերներուն ուշադրութիւնը գրաւել:  
Մրցումը աւարտեցաւ ի նպաստ ՅԱԸՍ  
Արարատին 54-44 արդիւնքով:

Շաբաթ երեկոյեան ժամը 7-ին տեղի ու-  
նեցաւ օրուան առաջին մրցումը Յելիոպոլ-  
սոյ ՅԱԸՍ ՆՈՒՊԱՐԻ 16 տարեկանէն վար  
տղոց ու Ալ Չուհուրի միջեւ: Հակառակ որ  
Ալ Չուհուրի տղոցմէ շատեր հասակաւոր ու  
յաղթանդամ էին, ՅԱԸՍ ՆՈՒՊԱՐԻ մարզիկ-  
ները իրենց արագ ու ճարպիկ խաղարկու-  
թեամբ շփոթութեան մատնեցին մրցակից  
տղոց: Խաղը աւարտեցաւ ի նպաստ ՅԱԸՍ  
ՆՈՒՊԱՐԻ պատանիներուն 41-37 արդիւն-  
քով ու յաղթական մարզիկները անհուն ու-  
րախութեամբ ստացան բաժակը, որ  
նուիրուած էր Տէր եւ Տիկին Յակոբ Գարա-  
կեօզեանի կողմէ:

Շնորհակալութիւն խումբին պատաս-  
խանատուներ ժիրայր Յակոբեանին եւ Ար-  
մէն Պալթայեանին, մարզիչ Ալաա Չահրա-  
նին եւ օգնական մարզիչ Մակետ Ահմետին,  
որոնց համբերատար հոգատարութեան  
շնորհիւ պատանիներու խումբը կանոնա-  
ւոր կերպով կը մարզուի ու կը պատ-  
րաստուի քանի մը տարիէն երեց խումբին  
միանալու:

Այա, խօսք առաւ ակումբին ժրաջան  
ատենապետ ժիրայր Տեփոյեան ու շնոր-  
հաւորեց Եգիպտոսի Չինեալ Ուժերուն 6  
Հոկտեմբերի յաղթանակին 41-ամեակը: Ան  
ներկաներէն խնդրեց յոտնկայս յարգել  
յիշատակը ՅԱԸՍ ՆՈՒՊԱՐԻ նախկին մար-  
զիկ, երկարամեայ վարչական ու բժա-  
խնդիր գանձապահ, հանգուցեալ ժիրայր  
Տրդատեանի, որուն յիշատակին Տէր եւ Տի-  
կին Հրայր Տրդատեան նուիրած էին երեց  
տղոց բաժակը:

Օրուան երկրորդ մրցումը Յելիոպոլսոյ  
ՅԱԸՍ ՆՈՒՊԱՐԵՆ, ՅԱԸՍ Արարատէն եւ  
Սրբուհի Թերեզայէն՝ վեթերաններէ կազ-  
մուած խումբին եւ առաջին օրուան պար-  
տըւած՝ Սրբուհի Թերեզայի երեց տղոց  
խումբերուն միջեւ էր: Տասնչորս վեթերան-  
ներ քով-քովի գալով, ինքնավստահօրէն

դաշտ իջան՝ ներկաներուն ծափահարու-  
թիւններուն ընկերակցութեամբ: Խումբին  
պատասխանատուներն էին Տոքթ. Գեորգ  
Երզնկացեանն ու Էտի Գարակեօզեանը,  
իսկ մարզիչը՝ Խորէն Գալընեանը:

Նախքան մրցումին սկսիլը, Տոքթ. Ճորճ  
Սիմոնեան, արաբերէնով խօսք առաւ ու  
խնդրեց ներկաներէն մէկ վայրկեան յոտըն-  
կայս յարգել մէկ օր առաջ Եգիպտոսի Չին-  
եալ Ուժերէն Սինայի մէջ ահաբեկչութեան  
նենգ արարքին զոհ գացած 30 զինուորնե-  
րուն յիշատակը:

Այա ան դաշտ հրաւիրեց պասքէթ պոլի  
մարզաձեւին մէջ իւրայատուկ երեւոյթ Պր.  
Կարպիս Զալփաքեանը, որ բոլորին ծանօթ  
է որպէս «Տաուլի»: Տոքթ. Ճորճ անհուն սի-  
րով ու երախտագիտութեամբ շնորհակա-  
լութիւն յայտնեց Տաուլիին, որ 1967-էն մին-  
չեւ 1980-ական թուականներու վերջը, հայ  
եւ Եգիպտացի մատղաշ սերունդներուն մէջ  
սեր մշակած է պասքէթ պոլին հանդէպ:  
Մարզիչ ըլլալէ զատ, ան եղած է միջազգա-  
յին ճանաչում ունեցող իրաւարար մը ու  
հանրածանօթ է Եգիպտական պասքէթ պո-  
լի ընտանիքին մէջ: Տոքթ. Ճորճ, յանուն Յե-  
լիոպոլսոյ ՅԱԸՍ ՆՈՒՊԱՐԻ վարչութեան,  
մետայլով մը պարգեւատրեց Տաուլիին:

Սկսաւ մրցումը վեթերաններու խումբին  
եւ Սրբուհի Թերեզայի միջեւ: Տարեց, սա-  
կայն փորձառու մարզիկները շատ լաւ խա-  
ղացին ու նոյնիսկ կարողացան 46-40 ար-  
դիւնքով յաղթանակ արձանագրել:

Աւարտական մրցումէն առաջ, ատենա-  
պետ ժիրայր Տեփոյեան հրաւիրեց Գերշ. Տ.  
Աշոտ Ս. Եպս. Մնացականեանը՝ Առաջնորդ  
Եգիպտոսի Հայոց Թեմի, Արհ. Գրիգոր Եպս.  
Գուսանը՝ Առաջնորդ Աղեքսանդրիոյ Կաթո-  
ղիկէ Հայոց, Նորին Վսեմութիւն Տիար Ար-  
մէն Մելքոնեանը՝ Հայաստանի Հանրապե-  
տութեան Արտակարգ եւ Լիազօր Դեսպան,  
Պր. Պերճ Թերզեանը՝ Պատուոյ Ատենա-  
պետ ՀԲԸՍ-ի Շրջանակային Յանձնաժո-  
ղովի եւ Գահիրէի ՀԲԸՍ-ի Վարչութեան,  
Պր. Օննիկ Պըլըքտանեանը՝ ՀԲԸՍ-ի Շրջա-  
նակային Յանձնաժողովի Ատենապետ,  
Տոքթ. Վիգէն Ճիգմեճեանը՝ Գահիրէի ՀԲԸՍ-  
ի Վարչութեան Ատենապետ եւ Պր. Հրաչ  
Սիմոնեանը՝ Յելիոպոլսոյ ՅԱԸՍ ՆՈՒՊԱՐԻ  
Պատուոյ Ատենապետ, բացումը կատարե-



լու նորակառույց մարմարեայ գեղեցիկ յուշակոթողին, որուն ճակտին վրայ գետեղուած է ԶԲԸՄ-ի հիմնադիր Պօղոս Նուպար Փաշայի հարթաքանդակը: Ծարտարապետուհի Տոքթ. Նայիրի Համբիկեանի յղացումով ու «Heritage Management Architectural Firm»-ին գործադրութեամբ, այս հուշակապ յուշակոթողը վերակենդանացուց տարիներէ ի վեր ակումբին մուտքի պատին վրայ ագուցուած բարերարին հարթաքանդակը:



Յուշարձանին վրայի քօղը վերցնելու արարողութիւնը կատարեց ԶԲԸՄ-ի Եգիպտոսի Շրջանակային Յանձնաժողովի Ատենապետ Տիար Օննիկ Պըլըքտանեան:



Ժամանակը եկած էր մրցաշարքին վերջին մրցումին՝ Զելիոպոլսոյ ԶՄԸՄ ՆՈՒՊԱՐԻ-ն եւ ԶՄԸՄ Արարատին միջեւ: Մինչեւ երկրորդ քառորդախաղին վերջը արդիւնքի տարբերութիւնը շատ չէր, սակայն ԶՄԸՄ ՆՈՒՊԱՐԻ տղաքը միշտ առաւելութիւն կը վայելէին: Երրորդ ու չորրորդ քառորդախաղերուն

հիւրընկալ խումբը բոլորովին տիրապետեց խաղին ու 57-39 արդիւնքով յաղթական հանդիսացաւ: Մրցումին վերջաւորութենէն քիչ մը առաջ, Զելիոպոլսոյ ԶՄԸՄ ՆՈՒՊԱՐԻ երկարամեայ մարզիկ ու խումբին քաբթէն Կարօ Վարժապետեան, վերջին անգամ ըլլալով դաշտ իջաւ ու աւարտեց իր 25-ամեայ գործունէութիւնը՝ որպէս մարզիկ խումբին մէջ:

Զելիոպոլսոյ ԶՄԸՄ ՆՈՒՊԱՐԻ յաղթական տղաքը, ակումբին անդամներուն ու համակիրներուն ծափահարութիւններուն ընկերակցութեամբ, ստացան Տոքթ. եւ Տիկին Զրայր Տրդատեանի նուիրած բաժակը:

Վարձքը կատար խումբին պատասխանատու Յակոբ Գարակեօզեանին, մարզիչ Ամր Աշուրին եւ օգնական մարզիչ Ալաա Չահրանին, որոնց աշխատանքին շնորհիւ Զելիոպոլսոյ ԶՄԸՄ ՆՈՒՊԱՐԻ տղոց խումբը 2014-ի ընթացքին երրորդ անգամ ըլլալով բաժակակիր կ'ըլլայ:

Այս տարուայ մրցաշարքին ընթացքին հաճելի անակընկալ մըն էր Տիկին Լալա Նիկոլեանին ելոյթը, որ յստակ առոգանութեամբ ներկայացուց մրցող խումբերուն անդամները:

Մասնաւոր շնորհակալութեան արժանի են Տէր եւ Տիկին Վարդ Ալեքսանեան, որոնք միշտ կը նուիրեն մրցաշարքին մետայլները:



Շնորհակալութիւն նաեւ Զելիոպոլսոյ ԶՄԸՄ ՆՈՒՊԱՐԻ վարչութեան ու Տիկնանց Յանձնախումբին՝ յաջող մրցաշարք մը կազմակերպելուն համար:

Սօսի Ներեւտեան-Յակոբեան

# ՅԻՇԱՏԱԿԻ ՆԿԱՐՆԵՐ ԶՄԸՆ ՆՈՒՊԱՐԻ 2014-Ի ՄՐՑԱՇԱՐՔԸՆ



Երեք տղոց խումբը



16-Էն վար աղջկանց խումբը որ շահեցաւ Տեր եւ Տիկին Գեորգ Աւանեսանի սուիրած բաժակը



ԶՄԸՆ ՆՈՒՊԱՐԻ ԵՒ ԶՄԸՆ ԱՐԱՐԱՇԻ ԵՐԵՔ Աղջկանց խումբերը



Երեք տղոց բաժակը սուիրած են Տոքթ. եւ Տիկին Զրայր Տրդատեան



Երեք աղջկանց բաժակը սուիրած են Տոքթ. եւ Տիկին Վիգէն Ծիգմեճեան



Վերթերաններու խումբը



16-Էն վար տղոց խումբը

